

#اعترافات_جامدة

"التلاتيني"

شريف أسعد

عنوان الكتاب : اعترافات جامدة

المؤلف : شريف أسعد

المراجعة اللغوية : عبد الهادي عباس

الإخراج الداخلي : رشا عبد الله

تصميم الغلاف : مينا مصرى

رقم الإيداع : ١٣٧٧٠ / ٢٠١٥

ردمك : 9-3-977-978-85204

الطبعة (12) : أغسطس 2015



المدير العام : هاله البشبيشى



دار توييا للنشر والتوزيع



dartoya2015@gmail.com



دار توييا للنشر و التوزيع Dar.toya



@Dar_Toya



Dar.toya



(+2) 01140899837 - (+2) 01000706014



٢٦٣ نش عبدالوهاب عبد اللطيف - كوبرى القبة -
القاهرة - مصر

جميع حقوق الطبع والنشر محفوظة للدار

#اعترافات_جامدة

"التلاتيني"

شريف أسعد

دار تويلا للنشر والتوزيع

إهداء

الابتسامة.. صناعة.. لا يُجيد استخراجها ثم معالجتها ثم
تكوينها ثم رسمها على الوجوه إلا مُحترف...
إلى كل من ساهم باحترافية في وضع ابتسامةٍ على شفاهٍ لا
يبتَغى من ورائها إلا وجه الله سبحانه وتعالى...

أهديكم هذا الكتاب.

أولكم "أبي" رحمة الله عليه

مقدمة

هذا الكتاب ليس مجرد كلمات وجمل تراصت لكي تدخل السرور والبهجة على قلب من يقرأها.. على الرغم من أن هذا في حد ذاته إنجازاً يستحق عمل تمثال من البرونز يوضع مكان تمثال طلعت حرب في وسط البلد..

ولكن.. تمت صياغة هذه المواقف وسردها في إطار الأسرة والاقارب والأصدقاء.. لكي نتذكر معاً أسرنا الصغيرة.. في خضم "هرس" الحياة لكل واحد فينا، كأننا "كيلو طماطم" من أجل الصلصة...

تذكروا أسركم.. وأقاربكم.. وأصدقائكم.. عودوا لصلة الجميع مرة أخرى كما كنا في الماضي.. وفي هذا السبيل.. يؤكد الكاتب أنه ليس مسئولاً بأي شكل من الأشكال عن حالات الضحك الهستيري التي تنتاب القارئ.. ويعلمن خُلو مسئوليته عن علاج أي نوع من أنواع الكسور الناتجة عن سقوط

القارئ من فوق أريكةٍ أو سريرٍ أو مكتبٍ ضاحكًا.. كما يتمنى
ألا تصله تلك العبارات والتعليقات التي لا تنفك تطارده في
كل مكان على شاكلة.. "أنا لو اطلقت حبيقتي بسببك" .. أو..
"لو اترفدت حتبقى انت السبب" .. أو "الناس بتتفرج عليًا في
المواصلات وبتقول عليًا مجنون" .. ومثل تلك العبارات التي لن
يتحمل الكاتب مسئوليتها على الإطلاق...

ألا هل بلغت؟.. اللهم فأشهد..

شريف أسعد

تقديم

حقة الثمانينيات والتسعينيات.. تلك الحقة الماسية التي
كونت لجيل كامل ذكريات متشابهة إلى حد كبير...

نحن عائلة مصرية بسيطة كالسواد الأعظم من العائلات
المصرية.. أسرة مكونة من خمسة أفراد يقودهم الأب المصري
الصميم "أبأبا".. وترعاهم الأم الرؤوم لكل فرد في مصر "أمأما"..
وتتكون الذرية من الأشقاء الثلاثة.. أبطال المواقف والحكايات
ومخزن ذكريات اليوم والغد في كل بيوت مصر على مر الزمان..

كثيراً ما نشتاق إلى لحظات وسط الأب والأم والأخوة بلا
التزامات وبدون أعباء الحياة اليومية.. كم منا يتمنى يوماً
واحدًا بدون محمول أو مُستقبل رقمي "ريسيفر".. أو مناقشة
سياسية تنتهي بـ"ست عُرز فوق الحاجب"...

اليوم وفي هذا الكتاب.. نساfer إلى ذكرياتنا بشكلٍ ساخرٍ
بسيط عبر مواقف عشتها.. وعاشها الكثير منا بشكلٍ أو بآخر..

اليوم نتحدث عن مواقفنا التي خُصناها مع أصدقاء
الطفولة والشباب.. المواقف التي عايشناها مع عائلاتنا الحبيبة..
المواقف التي تترك في داخل كل شخص منا ما يجعله يبتسم
حين يتذكرها..

اليوم أذكركم بكل أبٍ وكل أمٍ وكل أخٍ لكم..

تعالوا أقص عليكم قصتي!!!!

الاعتراف الأول

البداية لازم تكون واضحة.. أنا مش حاقد ر أدعي إني
سوبر مان.. وإني راجل مختلف عن كل الرجالة.. لأن الموضوع
أبسط من كده..

انا راجل طبيعي في حاجات.. ومش طبيعي في حاجات تانية..
الموقف ده.. حيثيت لكم بالدليل القاطع إني راجل مش
طبيعي في "الحاجات التانية"..

في ليلة من تلك الليالي اللي الواحد بيبقى حاسس فيها إن
فيه مشكلة أكيد تحصل والعياذ بالله..

كنت قاعد باتفرج على فيلم رعب في التليفزيون.. اليلة
طبعا سُكُون تام.. مفيش أي صوت غير صوت الساعة اللي
عقاربها بتقولك "الساعة الواحدة بعد منتصف الليل يا خفيف
وده مش وقت مناسب إنك تتفرج حتى على فيلم كارتون"..

للتوضيح فقط.. أنا كشخص مش بحب أفلام الرعب.. ولا بَطِيقُها في الأساس.. يعني اقدر أعترف لأي حد فيكم من الآخر إن أكثر حاجة.. أكثر حاجة مرعبة بالنسبة لي ممكن تكون مشهد "توم" أما بيجرى ورا "جيرى".. وقبل ما "جيرى" يوصل للفتحة اللي في الحيطه.. بكون أنا بعيد عنكم اتصفتت من الخضة..

أفكر من كام سنة اما دخلت فيلم "ذا رينج".. قعدت تقريبًا حوالي تسع أيام بخش الحمام وأسيب الباب مفتوح ومُؤارب.. عشان لو حصل حاجة انفد بجلدى.. مش مهم خالص حد يشوفنى في الحمام.. لأن الأهم بكتير.. إني ما اشوفش حاجة في الحمام.. أو حتى اتخيل حاجة في الحمام.. ده سيكون سبب كافي إني اتسرب في البلاعة اللي في الأرضية زية مية المسيح..

فما بال سيادتكم بقى بفيلم رعب من عينة الفيلم المأسوف على عمره "اكسيروسيزم اوف مارى زفته روز"؟؟؟.. أو مثلا فيلم من سلسلة أفلام "بارانورمال أنشطتى"!!!!?

المهم في الموضوع ده مش إن الانسان تبقى عنده الشجاعة إنه يقعد يتفرج ويقول أنا جدع.. لا خالص على فكرة.. المهم إن حقيقي الإنسان ده بيكون عنده قدرات عُمره ما بيتعرف عليها ولا بيكتشفها غير في المواقف الصعبة اللي زي دي..

يعني مثلًا.. أما تبقى قاعد في الضلمة بتتفرج على الفيلم المهيب المرعب ده.. لوحدك.. بطُوك.. ومفيش حد جنبك تقفش فيه أو تستخبي في جيبه لو حصل حاجة..

وللعلم برضو.. القَعَاد في الضلّمة دي مش شجاعة ولا شدة
بأس يعني.. ولا أي كلام من الهري الي ممكن تسمعه من
الشباب.. لا لا لا لا.. خالص حضرتك.. القعدة في الضلّمة دي سببها
الوحيد إن مراقي طفت النور وهى داخله تنام وأنا مش قادر
أحرك رجلي وانزل من على الكنبه وافتح النور من كتر الفزع
الي طالع على الشاشة.. طبعًا أنا قعدت أنه عليها كتير
عشان تيجى تاخذنى من الصالة.. إنها هى كانت في مرحلة
غز الملاك الي بيمد إيده في طبق الرز بتاعها في الحلم.. وكل
استغاثاتي راحت هباء..

للأسف بتبقى قاعد انت بقى وقتها.. بتتفرج غصب عنك
وتقريبًا عضم رُكْبِكَ في سقف بُوقِكَ من التقوقع.. وشعر راسك
واقف وقفة الدائري الساعة ستة ونص مساء يوم الاثنين..
وانت متأكد تمامًا.. إن الليلة مش حتعدى على خير..

وبعدين طبعًا.. هوووووب.. تلاقي مجموعة الكتب الي
انت راصها جنبك في المكتبة تتزحلق وتقع..

في بعض الأفلام الأجنبية المرعبة.. الي بتحتاج إلى أدوار
بطولة خارقة.. البطل الشرس المغوار المفتول العضلات.. بيقوم
يشوف الكتب اتوَكِّست واتزحلت ليه.. وإزاي أساسا تتزحلق
وهو قاعد؟؟.. ده اسمه إسفاف.. وغالبًا طبعًا زي ما بتتابعوا
إنتو في الأفلام دي.. الموضوع بيتنتهي بأن العفاريات الزُرُق
والخُضر والحُمُر بيلعبوا في البطل المغوار ده البخت.. ويعملوا
كولو بامية كمان على مين الي حيلعب فيه البخت الأول..
والبطل المغوار الي كان عامل فيها الممثل الرسمي لسباع

بالفشل تمامًا.. وخصوصا وأنا عمال أسقف إن فيه عفريت برة
في الصالة..

طبعا برضو كل محاولات مراقي لاقناعي إني أخرج أطفلي
التليفزيون اللي شغال برة كُتب لها الفشل أكثر من فشل
انتزاع شعرها من تحت رجلي.. وكان أسهل لها وأسرع وأضمن
تبعث تجيب البواب يطفى التليفزيون.. لاني حلفت بشرف
خالتي حَمُوَّة ما أنا متحرك من فوق المخدة غير اما بيعتوا
يجيبولي أمي أستخبي في حضنها..

طبعا كل محاولات مراقي انها تقنعني ليلتها اتوكس وأنام
ناحية باب الأوضة برضو كان من نصيها الفشل المروع.. لأن
العفريت طبعا بياكل أول واحد جنب الباب أول ما يخش..
ودي حاجة معروفة مش محتاجة فكاكة يعنى.. أنا بقى حطع
ناصح وحنام جنب الحيطه وحط البطانية تحت رجلي..
ومخدة فوق دماغي احتياطي إن شالله أموت مخنوق حتى..

طبعا كل محاولات مراقي إنها تغير قناة سبيس تون لمدة
شهرين.. فشلت فشل ذريع لأنى كنت مخبي الريموت تحت
شلتة الكنبه اللي عليها اثار بقعة المعركة السابقة.. ولو كنت
اتفرجت وقتها على سي بي سي سفرة حتى كان جالي شلل
توساعي من الرعب.. كفاية شنب الشيف الشرينى..

طبعا كل محاولات مراقي إني أتكرم واتفضل واتنازل واطلع
الشقة وأنا راجع من الشغل من غير ما تبقى باصة لي من
بير السلم فشلت بجداره واستحقاق برضو.. والمرة اللي كانت
مشغولة فيها وايديها مليانة صلصة ومعرفتش تطلع تبصلي

الاعتراف الثاني

طول عمري ما بخافش من الكلاب.. ومن زمان على فكرة.. أبابا الله يرحمه قالى أما أي كلب بلدي مسلط في الشارع يبجي ناحيتك.. إعمل نفسك بتجيب طوبة من الأرض أو انزل اربط رباط الجزمة "قال يعني هو مفكوك بقي وبتاع".. وارفع إيدك.. حتلاقي الكب البلدى ده قلب قطة وجرى صاروخ واختفى من قصادك.. وديله ما بين رجليه..

أما كلب بلدى صحيح!!!

وفعلًا.. كنت بنفذ دايمًا وصية "أبابا" الله يرحمه كل ما الاقي كلب عامل فيها نمر أرقط بنغالي على مطلع كوبري المشاة مثلا.. أو تمساح أمازوني مغطى بحراشيف خضرا على ناصية شارع قاعد بيتشمس..

لحد ما جه يوم إسود ومهيب ما طلعتلوش شمس..

وكنت لسة حلو كده تمناشر سنة وراكب العجلة ورا
واحد صاحبي عزيز عليا جدًا.. اسمه "حمادة مطايفي"..

طبعا إحنا كنا في وقت العصارى ده نحب نتمشى بالعجل
في الشوارع الهادية بتاعة المعادي.. وكنت دايمًا مؤدي بارع
لدور "شادية" في فيلم معبودة الجماهير أما كانت راكبة
ورا عبدالحليم حافظ.. وأفضل أغنى "في السكة في السكة في
السكة" بتاعة محمد فؤاد ساعتها..

كنا ماشيين بالعجلة في شارع من شوارع المعادي اللي
جنب البيت عندنا.. ومعديين من عند فيلا رجل أعمال كبير
جدًا.. كان ساعتها وزير..

كنا طول عمرنا أنا وجيراني وأصحابي بنعدي من جنب
الفيلا دي.. وكان فيها كلب حراسة "وولف" من بتوع زمان
أصيل ومررب كده ومفترس حلو أعتقد كان ثلاث ارباع
جسمه سنان وأنياب والرابع الباقي مخالف.. كان مربوط
بسلسلة حديد جنزير دايمًا من اللي بيسحبوا بيها المقاطير
دي.. لأنه كلب عفي ومحتاج يتثبت كويس.. بدل ما ياكل
سكان الشارع غلط والا حاجة..

قعدنا سنين من حياته وحياتنا نعدي عليه.. وهو مربوط..
ولأنه مربوط.. كنا دايمًا بنعامله على إنه فرخة شامورطي.. أو
معزة محلوبة لا حول لها ولا قوة..

نحدفه بالطوب مثلًا.. وهو بقى يا عيني..

هاو هاو هاو هاو هاو

نعمله اشارات استفزاز وهمية.. وهو حيتجنن..

هاو هاو هاو هاو هاو

ننام قصاد الجراش بالعرض ونرفع رجلينا لفوق دليل
على عدم الخوف منه ومحاولة مننا إننا نجيبه بوهاق من
الغيظ.. وهو طبعاً..

هاو هاو هاو هاو هاو

الخلاصة.. الكلب كان حيتجنن لمدة سبع سنين تقريباً..

وفي اليوم الأزرق ده اللي بيحكلكم عليه ده.. عدينا
بالعجلة من قصاد الجراش اللي مربوط فيه الكلب.. لقيناه
قاعد عادي جداً.. زي كل مرة بنعدي فيها.. طبعاً صاحبي سايق
العجلة.. وأنا بحكم العادة ليس إلا.. بصيت للكلب.. وهاتك يا
رقص رقصات أقل ما يقال عنها إنها مثيرة ساخنة.. اقتبست
منها شاكيراً بعد كده رقصاتها في أغنية "وين ايفر".. ما كانش
ناقصلي إلا إني أعمل "استريبتيز" للكلب.. وكل ده من أجل
إغاظته فقط لا غير.. وعشان اسمعه وهو بيقول..

هاو هاو هاو هاو هاو..

وحشني..

عمري في حياتي ما حانسي وش الكلب ساعتها.. طول
عمري.. أكاد أجزم وأقسم.. إن الكلب تقريباً ظهرت على وشه
"ابتسامة" سعادة

ابتسامة انتقام.. ثم.. انطلق..

وفيه ناس أكدت إن الكلب نفسه ارتفعت حواجه
اندهاشا من سرعتي في الجري.. ووقف يسقف
طبعا الحمد لله.. أنا كنت أسرع من العجلة بكتيير
ساعتها.. ونفدت بعمرى..

والحمد لله إني ما حاولت أنفذ وصية "ابابا" في اللحظة
دي.. لأن ده مش كلب "خرمنط" بلدي عقيم.. وإلا كانوا رجعوا
اللي اتبقى منى لأبابا في كوباية بلاستيك.. وبعدين الكلب كان
شكله مكنش ناوى يتراجع حتى ولو كنت حدفه بإزاحة
مولوتوف أو قنبلة يدوية.. أو حتى لو كان في إيدي مسدس..
وخصوصا بعد سنوات من الإهانة والمعايرة والسباب بالكلبة
الأم بسبب وبدون..

أفندم؟ نعم؟؟ ااااه.. صاحبى أبو عجلة؟؟ تقصدوا حمادة
مطافى؟؟!!

لا لا بسيطة الحمد لله..

حمادة ما اتبقاش منه حاجة غير بلف العجلة..

#اللص_والكلاب

#اجرى_اجرى_اجرى

#سلام_يا_صاحبى

الاعتراف الثالث

مين فينا ما راحش فرح ما يعرفش فيه حد خالص؟!..
وحس وقتها إنه طالع كده زي البتاعة في البتاع؟؟؟ ولا له أي
لازمة!!

أكيد كلنا عدى علينا بشكل أو بآخر موقف اتجررنا
فيه.. اتشالنا واتحطينا واتحشرنا في بدل وفساتين "سواريه"..
وتم دُفَسنا في عربيات ضيقة جنب بعض.. وتم اقتيادنا إلى
صالات أفراح كالعييد إلى أمريكا الشمالية.. واترمينا في احضان
ناس ما نعرفهمش ولا عمرنا شفناهم واتباسنا منهم بوس غير
طبيعي بلا وعي.. وشدولنا وشنا عشان نبان بنضحك في الصور
واحنا أصلا عندنا مَعَص.. واتهددنا من أهالينا بأننا حنّام من
غير عشا لو ما اتيلناش قمنا جنبنا أكل من مجمع التحرير
الساعة اتناشر الظهر الي بيطلقوا عليه ساعتها بالكذب..
"البوفيه"!!

أبأبا كان رايح يجمال زميل له في الشغل.. وكان الفرأ في بيت زميله ده.. لا في دار ولا فندق ولا بتاع.. مكان أول مرة يروحه أبأبا.. ووصلنا إلى الشارع.. وشفنا اللمض الملونة والكهارب اللي مزوقة البيت.. كان فرأ في بيت بسيط جميل.. وبدأنا نركن العربية..

وأخذنا التورته!!

ودي كانت أول حالة يسجلها التاريخ الحديث إن عيلة تروح فرأ بتورته.. كانت عيلتنا الحمد لله.. الكلام ده متسجل في موسوعة جينيس للأفعال القياسية اللي تفضح الحمد لله جنبًا إلى جنب مع عبارة "أبأبا" الخالدة..

- خللي بالك من التورته يا حيوان لتقع

- حاطر أبأبا.. في عينيا

شيلنا التورته الملكية.. وطلعنا الدور الرابع.. ودخلنا الشقة واستقبلنا الناس أصحاب الفرأ استقبال الفاتحين طبعًا.. ويا أهلاً.. ويا سهلاً.. ويا تلتوميت مرحبًا.. والحمد لله.. سلمت التورته لأحد الناس اللي معدية ولابسة بدلة.. وخذت بيها إيصال امانة إنها سليمة كمان..

وبدأنا مراسم الاحتفال.. ودخلنا أنا واخواتي بقى ما قولاكش.. قلبنا الفرأ درمغة.. ورقصنا مع العروس.. واتنططنا مع العريس.. وهيببصة طبعًا.. الفرأ اتقلب مع وصولنا بالفعل.. أبأبا طول عمره يقول علينا عيلة تفضح.. بضرب

بعينى بعد ساعة ونص من الرقص الهيستيرى أنا واخوتى..
لقيت أبابا بيشاورلى بما معناه..

"تعالى عاوزك بسرعة يا حيوان"

انسحبت من وسط الرقصة بهدوء.. وأنا سايب ورايا
أسدين: اخواتى نازلين رقص لحد ما كانوا حيهودوا السقف على
دماغ الناس اللي تحت.. واتجهت ناحية "أبابا"..
- خير أبابا؟؟

- أنا مش شايف فين أبو العروسة..

- طب وايه المشكلة أبابا.. عادى.. فيها إيه مش فاهم..؟؟

- أنا مش عارف ولا واحد من المعازيم.. غير أبو العروسة..
ومش لاقيه

- أبابا دلوقتى يظهر.. تلاقيه بيعمل حاجة كده والا كدة..
فرح بقى عقبال ولادك أبابا

- اخرس يا حيوان.. أنا حاسس إن مفيش ولا واحد من
الزملاء في الشغل موجود في الفرحة والموضوع ده قالقنى.. أنا
شامم ريحة مش تمام

- آآآآه في دي عندك حق.. البوفيه بتاعهم ريحته تقرف
القنفد الموريتانى فعلا..

- اخرس يا حيوان.. بوفيه ايه؟؟ أنا أقصد اقول إني قلقان
جدا..

- امممم..؟؟ طب عاوز إيه أبابا خلصنى أغنية شيك شاك
شوك قربت تخلص.. والأغنية اللي جاية بتاعة حكيم "أعمل
إيه ولا إيه والا إيه" وأنا مستنيها من أول الفرحة عشان متمرن
عليها كويس.

- بس يا حيوان اخرس.. روح كده اسأل على أبو العروسة..
شوفو فين

- أبابا أنا مالي؟؟؟ أسأل أعمل إيه يعنى..؟؟

- ياللا يا حيوان.. روووووح.. "مصحوبا بزُغد في الكتف"

- حاضر أبابا..

وبالفعل.. اتجهت مُنْسالاً بإنسيابية كراقص الباليه وسط
الزحام.. مُتجهًا إلى حيث بدا وظهر مجموعة من الناس
"المُهمين".. وسألت..

- هو عمو "مُحسن" والد العروسة فين؟؟

واحد منهم رد..

- أنا أبو العروسة يا حبيبي.. بس أنا ما اسميش عمو
"مُحسن".. أنا إسمى عمو "سام"

طبعًا.. أنا بكل فتاكة.. وفكاكة.. عملت نفسى اتلخبطت
في الاسم.. وسورى قوى يا عمو.. معلش أصل الرقص فرهضنى..
وسألت على مكان الحمام لإني محتاج أعمل بيبي ضرورى يا
عمو من كتر شربات الورد اللي سفيته وشكلي عندى بوادر
إسهال كمان.. وبعدين طبعًا رجعت لبابا عشان أبشره بالخبر
الإسود..

- أبابا.. احنا تقريبا كده والله اعلم.. في فرح غلط

- يا دي المصيبة.. إنت كده ما بيجيش من وراك غير
المصايب.. حيوان.. بومة

- لا حدد بقى.. حيوان والا بومة؟؟؟ أنا مالى أنا أبابا؟؟؟؟

- بس يا حيوان..

- حاطر أبابا.

كان فات حوالي ساعتين ونص بالفعل.. وأبابا.. توجه إلى
صاحب الفرحة.. وبطريقته اللطيفة الرائعة التي لا تخلو من
اللباقة.. فهم الراجل إنه جه فرح غلط.. والراجل أكد له
فعلاً بابتسامة ترحاب ومودة.. إن بالفعل فيه فرح تانى بعد
أربع بيوت على نفس الصف في آخر الشارع.. وان أكيد حصل
لخبطة..

وحلف علينا ما نمشى غير لما البوفيه يفتح.. وأبابا
اعتذرله بكل ذوق..

ونزلنا من الدور الرابع.. ومنظرنا عبارة عن مجموعة من
الغيارات على حبل غسيل من غير مشابك.. مبلولين..

وصلنا لحد العربية.. وبعدين.. هوبال.. أبابا وقف..
بصلي.. وسألنى باندهاش مدهش الصراحة..

- فين التورتة يا حيوان؟؟

- نعم؟؟؟؟؟؟؟؟؟؟

- إطلع هات التورتة...

- بس أبابا بدل ما احدف نفسى قصاد عربية..

- إمشى يا حيوان بسرعة.. إنت عاوزنا نخش على الراجل
بإيدنا فاضية؟؟

وبين مناقشات لمدة عشر دقائق.. وحلفان على أمي
بالطلاق لأجيب التورتة.. ورمي اخواتي في دار الأحداث..
ومحاولاتي المستميتة استعطافه واستمالة قلبه إنه يرحمني من
الموقف ده اللي حكون فيه شبه العرسة اللي بان على بطنها
فضيحة الحمل.. اضطرتت صاغراً في النهاية إلى إني أقول الجملة
الخالدة.. حاضر أبابا

وبدأت رحلة الصعود مرة ثانية عشان الزفتة.. أقصد
التورتة

وكان في استقبالي عمو " سالم " .. خلاص بقى.. دا بقى عشرة
أصله..

وطبعًا بمظهر يجمع ما بين القطنيل والجيل وأبو دكة..
شرحته الموقف.. والراجل تفهم ضاحكًا مبتسمًا.. وجابلى
التورتة.. ونزلت بيها وأنا حموت.. حموت أحدها من بير
السلم وأنزل ألمها تحت وأعييها في العلبة من غير ما أبابا
الحاج يعرف..

ركبنا العربية.. روحنا الفرحة التاني.. ودخلنا مش طايقين
نفسنا أساسًا.. سلمنا على الناس.. طبعًا السلام كان مختلف
بقى.. سلام الناس اللي عارفانا فعلًا.. واستقبل زملاء أبابا بقى
عيلتنا بترحاب شديد ومودة.. لحد ما جه واحد لطيف كده

بيحاول ياخذ منى التورتة اللي شايلها على قلبى أما جابتلى
الدوالى من الطلوع والنزول.. طبعاً أنا استوقفته بإيدى في
صدره.. وقولتله :

- عندك.. إنت مين سعادتك؟؟

- أنا "أحمد محسن" أخو العروسة.. عنك عنك

- باس باس باس.. روح اندهلى "مُحسن" شخصياً ياخذ
التورتة يا ابنى إنت

#مش_هارووووووووووح

#حاضر_ابابا

#تورتة_جلوباس_الشهية

#افراح_ايه_الى_بيروحوها_بتورت_دى

الاعتراف الرابع

”سحلية ولبسة مايوه“

ده مش عنوان لفيلم.. ولا اسم قصة.. ده وصف لشكلى وأنا عندى ستاشر سنة وأنا واقف على الرملة على البلاج في المعمورة أما كنت باطلع المصيف مع أبابا وأماما وإخواتي المقاطيع..

طبعا ده مكنش إحساسي وقتها.. ولا احساس أي شاب بنفسه في السن ده..

إنما إحساسي وقتها إني طبعا عبارة على مثلث جينة لافشكيري مقلوب كبير.. عريض المنكعين من فوق.. عضلات مفتولة الصدر.. ضُرغام متحرك على الرمال في خيلاء وكأنه الجبل.. وإن البنات اللي في البحر وبتعوم دي.. مش بتعوم أساسًا.. دي نازلة البحر تنتحر من شدة فتكس ووسامتس

وخصوصاً شوية الريش الاسود اللي منبتين تحت مناخيري وأنا
مصدق ومقتنع فعلاً إنهم شنب..

بينما في واقع الأمر.. ونظراً إلى الصور اللي أبابا كان
بياخودها على الشط عشان يوثق الحادثة ويذلني بيها
بعد كدة.. ويعرفنى مدى الكارثة اللي حلت على البشرية..
اكتشفت ان البنات اللي في البحر دي.. كانت بتغرق فعلاً.. مش
من وسامتى ولا فتكى ولا فتحي حتى.. إنما كانت بتغرق من
الضحك على منظرى!!!

وده بياخدنا ويرجعنا مرة ثانية إلى العنوان الرئيسي..

سحلية ولبسة مايوه

في سنة من السنين.. كنا مع الأسرة اللي طالعة تبع الشغل
عند أماما.. هما نفس الوشوش اللي بنطلع معاهم كل سنة..
زميلات أماما في العمل.. وأبنائهم اللي كانوا دائماً بنات.. إنما
بشكل أو بآخر.. شاءت الأقدار إن أنا واخواتي الاتنين نكون
مسؤولين عن هذه الفرقة من "الإناث" بحكم قال إيه.. إننا
رجالة.. وإننا أكبرهم سناً.. وإننا متربيين.. كل الحجج اللي
بيقولها أهاليهم عشان نشتغل لهم حراس في المصيف سمعناها..
وطبعاً.. وقتها.. ده كان بيدينا إحساس أنا واخواتي اننا
في مسلسل "باى واتش".. واننا بنيجي اسكندرية مش عشان
نصيف.. لا خالص..

احنا بنروح عشان نحرس القطيع وخصوصا إنا اسرة
سباحين أساسًا من صُغرنا.. "حقيقة علمية خاصة بنظرية طفو
الخشب"

وطبعًا مفيش مانع إنا نستشعر إنا مسؤولين عن أمن
وسلامة الحدود الشمالية للبلاد في هذا الوقت.. ضد أي محاولة
لاختراق المياه الإقليمية..

"ما تخافيش يا مصر.. وراكي ضفادع.. بشرية طبعا"

وكما هو البروجرام كل يوم.. نزلت البنات إلى مياه البحر
الاييض المتوسط.. بينما كنت أنا حارس الشمسية والكراسي
وأكياس اللب والسندوتشات والترامس والشباشب والفوط
والأكياس البلاستيك الفاضية الي حناخد فيها الفوط المبلولة
واحنا مروحين... وكان اخواتي الاتنين بيقودوا الفوج الثاني الذى
يمثل السيدات الأمهات القادمات من البيوت ولسة ما وصلوش.
وبعدين.. البنات غوطت شوية في البحر.. وبعدين طبعا..
حدث ما تعتقدونه.. بدأت علامات الغرق تظهر في صورة
"بلولوق.. بلولوق.. بلولوق".. وبدأت علامات الاستغاثة تلوح في
نداءات على شكل

- "احبيبيه بنغرق الله يحرقك غبي" ..

وطبعًا.. هذا ما كان ينتظره التاريخ ليدونه عني..

هي دي اللحظة الي بيستناها كل شاب عشان يقلع
الفانلة "الجل" الواسعة نمرتين عليه.. ويجري ثلاث خطوات
وهووووب يدخل براسه في الرملة الي في اول الموج دي زي

أنا بعرف أعوم كويس جدًا.. لكن معنديش خياشيم
للأسف..

تسع بنات في محاولة إنهم يتعلقوا بعصاية غلية أساسًا
كان موضوع فاشل من البداية..
وهنا.. هنا فقط.. وقف التاريخ..

وبعدين وقع من طوله عاملاً بيبيى على روحه من
الضحك.. جراء محاولتي المستميتة الهروب من البنات وهما
ممسكين بيا كما العوامة السوداء داخل الربع نقل المنفوخ
على ثمانية وعشرين..

كل محاولاتي للهروب فشلت.. أعوم في ناحية الاقى
واحدة.. ألف الناحية الثانية الاقى واحدة.. ابتديت ارفص بقى
كرد فعل طبيعي لاسفيسيا الغرق بلا جدوى.. ابتديت أشتم
بقى يمكن يتكسفو ويسيبوني.. محصلش.. كانوا بيغرقوا وما
فيش مجال للأدب أو الكسوف.. دخلت بقلب في نوبة سريخ
حاددة كسريخ الفقمة عندما يهجمها القرش الابيض.. وأخيرا..

جاء الإنقاذ من عند رجاله الشط المنقذين فعلاً مش اللي
شبه سفاية الرنجة أمثالي.. أربع منقذين عتاوله.. وصلوا في أقل
من عشر ثواني على وصولي.. عدو عليا كأنهم أسبوعين.. وأول
واحد وصل منهم.. مسكت فيه بنت من اللي كانوا بيغرقوا..
طبعا دي جبتها من شعرها في المية علطول.. واتشعلت في
رقبته مكانها زي الكابوريا النتاية..

تبادل المنقذين الإمساك بالبنات وإنقاذهم.. والحمد لله
طلعنا كلنا..

ومن يومها.. تذكر كل الأمهات مع التاريخ طبعًا- بطولتي
النادرة من أجل إنقاذ أرواح بناتهن الصغيرات.. وخصوصًا ان كل
البنات خرجوا كويسين جدًّا الحمد لله.. وأنا خرجت في شبه
حالة إعياء.. نتيجة تناوب البنات الاعتماد عليا بين الزراعات..
قصدي بين الموجات..

#يا_حلو_صبح_يا_حلو_طرز

#سيذكر_التاريخ

#الانتحار_الجماعي_للحيتان_على_شواطئ_استراليا

الاعتراف الخامس

كثير قوي بأصحى مفزوع من النوم على هذه الذكرى
القدرة.. أنا وأخويا الوسطاني.. كانت أماما الله يديها الصحة
وطولة العمر.. ويسامحها على العقدة النفسية الي مسبها لنا
لحد النهاردة..

كانت بتاخذنا كل أول شهر كدة.. حلوين.. تمان سنين
وست سنين كدة.. براعم تشرح القلب.. وتروح تودينا عند
"الأسطى أونكل عزت الحلاق"..

طبعاً سييك تماماً من إنها كانت بتعاملنا معاملة المعيز..
بدءً من جرجرتنا في الشارع غصب واقتدار عشان نروح نحلق..
ومروراً بمحاولاتنا المستميتة التي لا تنتهى أنا واخويا الفرار
والهروب عشان نحذف نفسنا تحت أي مكروباص معدي
أفضل كثيراً من مواجهة أونكل عزت.. ونهاية بوضع أونكل
عزت قبضته على كتفنا احنا الاتنين وعلى وجهه ابتسامة
سمجة كدليل على استلام البضاعة استعداداً لتجهيزها..

كان الأسطى أونكل عزت كشخص عبارة عن جسم عليه خزان مية فاضي.. رأسه وإيده كانوا أكبر من جسمه بكثير.. صورة فرانكنشتاين في عقلى كانت جنبه أكنها صور سنووايت في أوضاع رومانسية.. كان دايمًا عندى فضول رهيب اسأله.. انت بتلبس الفانلة ازاي أعمو؟؟؟ وازاي بتعدى من رأسك دي اللي عاملة مشكلة للأقمار الصناعية في الفضاء؟؟؟

طبعًا لى مش متخيل.. أنا باتكلم عن محل حلاقة في أوائل الثمانينات.. يعنى لا كان فيه مناديل تتلف حوالين الرقبة ولا امواس بتتغير ولا مقص بيَقص أساسًا.. اذكرك إننا في مرة من المرات حلقتنا شعرنا "تتفًا" .. وبالمقص برضو..

الأسطى أونكل عزت كان عدو التكنولوجيا تمامًا.. والتكنولوجيا في حالتنا دي هى "سَن المقص" ..

كنت في بعض الأحيان اتمنى ارواح عند حلاق الخرفان لاني كنت على يقين إنه هيكون "أحن" عليا منه بكثير.. إنما لم يسعفنى القدر لبلوغ المرحلة دي.. وكنت دايمًا واقع في مرحلة مواجهة الوحش اللي مفيش قبلها حاجة سهلة بتقابلها!!

الأسطى أونكل عزت كان بيقتعد واحد مننا على الكرسي.. ويحاول يخللي التاني وراه.. بحيث إنه يبقى مغطى بين الاخ وأخوه عشان اللي ورا يا كبد أمه.. ما يشوفش أخوه وهو بيتعذب.. نفس نظرية دبح الخرفان.. ما تدبحش خروف قصاد خروف.. كفاية عليه بس يسمع صوته وهو بيصرخ طلبًا للاستغاثة بلا جدوى.. وده لوحده كان كفيلا إن كل واحد مننا يقوم ياخذ دوره وهو سايب تحتيه "فطيرة" من الخضة..

كانت العملية عبارة عن "تعذيب سادي صرف".. لا علاقة لها بفن الحلاقة من قريب أو من بعيد.. مبدئيًا هي فورمة وقصة واحدة بس.. قصة "حوود لأففشك".. التي لا تتغير.. وبعدين أونكل عزت كان يتعامل مع رأس الواحد منا على إنها بطاطساية صغيرة.. كان ييقشرها مش بيحلقها.. يجيها يمين.. يجيها شمال قوي.. تطق في إيده ما يضرش.. تتعوج وتدلل على صدرنا فايأكد إننا لسة صاحيين ما موتناش إنما ممكن تكون حالة إغماء من التعذيب وطفى السجاير غلط بس فيبقى عادى.. يرش في عينك كولونيا تقوم سارخ.. يروح واكلك على بوقك.. تنام تانى.. كده يعنى..

الأوسطى أونكل عزت.. كان أحيانًا يعدي عليه حد يقف على باب المحل ويتكلم معاه.. وحد فينا تحت إيده الكريمة.. وبيتدوا يتناقشوا في موضوع لحد لما يتزفز ويندمج من الحوار وبيتدى بقى يشوح بالمقص...

مش حكمل أنا لإن التفاصيل مرعبة..

أماما كانت بتلف لفة وترجع تاخذنا على ما نكون خلصنا حلاقة وتقف على باب "الصالون الثقافى" اللي بيقدم النهاردة قصيدة "وأنا كالجزمة في إيده".. وتسأله بخضة..
"العيال فين؟؟؟"

طبعاً أونكل عزت كان بيشاور علينا مش بيتكلم.. مفيش فرانكنستاين بيقول غير جملة واحدة..
"إنه حي".. ويجري..

واحنا قصاد عنيهما ومفيش غيرنا في المعتقل.. بس من
كثر السحجات والتشوهات الخلقية والغرز والعيون والجفون
والحواجب اللي مضروبة مفكات.. ما كنتش أماما بتصدق اننا
عيالها.. غير لما تسألنا على كلمة السر..

أحيانا أماما كانت بتكمل سؤالها ليه بعد ما يشاور لها
علينا.. وتسأله..

"هما دول؟؟؟ بجد؟؟؟ طب احلف بأمك كدة!!!"

كنا بنخرج من عنده وكم الإهانة اللي على وشوشنا اكبر
من ان يتحملة بشر.. وكانت أماما بتاخذنا نرجع نحلق عنده
تاني كل أول شهر.. مش عشان شعرنا طول في الشهر ده.. لا
أبدًا..

ده عشان مدة الشهر كانت يا دوب كافية نكون اتعالجنا
وخفينا من السحجات والجلطات اللي في الوش مش أكثر..

#اللاوسطى_اونكل_عزت

#اريد_حبا_و_ختانا

#حلاق_الصحة

#يا_ريتني_كنت_خروف

الاعتراف السادس

"نينا"

مش بتاعة عماد حمدي.. لا.. بتاعة أبابا الله يرحمه
ويرحمها ويשבش الطوبة اللي تحت راسهم هما الاتنين..
كانت بتحب أبابا جدًّا جدًّا.. وكانت تحبنا الخير أنا واخواتي
قوي.. بس على قدها طبعًا..

كانت "نينا".. ساكنة في شارع القصر العيني.. واحنا من
سكان المعادي.. وكانت تحب كل فترة كدة.. تدهنا عشان
"تبششها" علينا.. وخللوا بالكم من "تبششها" علينا دي..
واحنا كشباب طبعًا.. طول عمرنا "مُقصرين".. وعندنا لعب
وأصحاب ومش فاضيين.. فكان من وقت للتاني.. لا بد من
تدخل أبابا بكل هدوء وحكمة والتوجيه لنا بالنصح والإرشاد
على شاكلة:

"لو مرحتش لستك بكرة مش حدلك البيت يا حيوان"

"إنزل يا حيوان روح لستك عشان عاوزاك"

وكانت الإجابة الدائمة في جملة واحدة لا تتغير..

"حاضر أبابا"

وطبعًا.. بانزل من البيت واتجه إلى القصر العيني عن طريق المترو من المعادي وأنا باتسلى في السكة بالندب على اليوم اللي ضاع مني لاني مش حلعب أو مش حخرج أو مش حأنتخ.. وكله عشان خاطر "نيننا" عاوزاني في حاجة مهمة جدًا.. وطبعًا مهمة جدًا دي بتدخل في خيالك دور "رأفت الهجان" في مسلسل "دموع في عيون تافهة".. المهم..

عارف إنه مش بتاع رأفت الهجان.. قَصروا..

كانت "نيننا" الله يرحمها تاخذنا من أول اليوم.. وبعدين تظطرننا.. بكل أنواع الجبن والبيض اللي كانوا في التلاجة عندها من حوالي ربع قرن.. وتقريبًا كانت الحاجة دي فاضلها بتاع ست ثواني كده وحتبدأ في خلق حياة ذاتية من كمية العفن و"الفنجاى" اللي متشعب فيها..

حتسألني وتقولي.. طب وهي ما بتكلش منهم.. أقولك لا سعادتك.. "نيننا" خلاص.. عايشة على الزبادي بحكم السن.. حتسأل وتقول اومال بتجيب الحاجات دي ليه.. حقولك تقريبًا بتجيبها عشان يقعدوا في التلاجة لحد ما يعفنو وبعدين تبعت تجيبنا عشان ناكلهم.. الأمور تحولت إلى روتين بفعل الزمن سيدي الفاضل..

المهم بعد ما القدر بيعث بمعجزة من السماء.. وتتجاوز
سيادتك مرحلة التسمم الدموي نتيجة اكل كوكتيل السموم
الكافي لقتل تريناصور ريكس من العصر البلشوفي..

تدخل في مرحلة الدلع بقي..

- تعالى كده يا واد يا شريف.. قيس القميص ده..

- قميص ايه يا "نينا"؟؟؟..

- القميص بتاع أخويا لله يرحمه..

- أيوة يا نينا بس ده ياقتنه جناحات طيارات.. يعني
ممکن معرفش اخرج من باب الشقة لو لبسته.. حاتحشر

- يا واد بطل لماضة.. قيس القميص..

- يا نينا أحب على ضوافر رجلك.. السيرك القومى مكانه
في العجوزة مش في شارع القصر العينى..

- حتلبس والا اتصل بابوك.. هاااا؟؟؟

- لا.. أبابا لا.. حا ألبس.. يا نيينيينيينيينة

- بتقول ايه يا واد؟؟؟

- بقول حلبس اهو يا نينا..

ثم أدخل إلى الحمام مطأطأ الرأس.. خالغًا ملابسي القطعة
تلو القطعة.. ومشاعرنى تخبرني بأن أحد ما سيقتمح الحمام
محاولاً هتك عرضي بلا شك..

لكن هتك العرض لم يكن في الحمام.. هتك العرض كان
مستينين في المرابا برة بعد مشاهدتي لمنظري مرتدياً ذلك
القميص..

خرجت لنينا طبعاً.. وعلى وشي ابتسامة أقل ما يقال إنها
ابتسامة ضفدع

- الله الله الله.. حلو عليك خالص يا واد يا شريف

- تحبي ابدأ الفقرات يا نينا واتشقلب؟؟؟

- بس يا واد لاقول لأبوك.. ده حيفرح قوى أما يلاقيك
داخل عليه بيه

- أدخل على مين؟؟ بأيه؟؟؟ هو أنا حاروِّح كدة؟؟

- آه طبعاً.. وشوف بقى الناس اللي في الشارع حتقول عليه
إيه.. تحفة.. لو حد وقفك سألك عليه.. ما تقولوش بقى..

- لا ما أنا عارف انه تحفة من غير الناس ما تقول
يا نينا.. شوفي يا نينا.. استحلفك بكل ما هو عزيز لديك..
وشرف ام شهداء دنشواى اللي عاصرتيهم شهيد شهيد.. وحمامة
حمامة.. حاخذ القميص في كيس واروح البسه في البيت.. عارفة
حنام بيه كمان

- لا طبعاً يا واد.. حتروِّح بيه يعني حتروح بيه.. إنت
واد عبيط ومش عارف مصلحتك.. ومش عارف قيمة الحاجات
دي.. دي تحف؟

وتبدأ مراحل الانهيار العصبى.. وصرخات الرحمة تصدر
من حنجرتي وأنا ممسكا بكعب قدمها ونازل تقبيل في

الشبشب اللي بصباح الذى ترتديه منذ بدأ الخليقة.. وتبدأ هي في الحنين.. وكلمة من هنا على كلمة من هنا.. تقولي.. - خلاص.. بص.. أنا كنت شايلالك حاجة تانية ليوم تاني.. بس طالما مش عاوز حد يشوف القميص عليك.. حدليك بقى البالطو اللي كنت "عايناهولك" للمرة الجاية عشان تلبسه فوقيه ويبقى طقم على بعضه..

أنا أدور ببصرى كالمجنون.. لأتلمس طريقا للشباك المفتوح إستعدادا للقفز والانتحار.. في الوقت الذى "تزك" فيه نينا في طريقها إلى الغرفة المظلمة التي تحتوى على مقتنيات من احتلال المجرات المجاورة.. وكم لا بأس به من كنوز الملك سُليمان ثم تخرج عليا بالطو من بلاطى الجن الذى كان مسخرهم الملك سليمان بنفسه..

وهنا.. لا تحتمل قدمى المشهد خالص.. فأخر صريعا على أقرب كرسى..

هذا البالطو إن لم يكن يخص المرحوم "هتلر" ألف رحمة ونور تنزل عليه.. فهو بالتأكيد بالطو "موسوليني".. البالطو ده مش حيخرج عن الاتنين دول..

وبعد تهديدات وشيكة بالاتصال بـ"أبابا".. وبعد محاولات فاشلة عدة منى للانتحار بطرق مختلفة.. أنصاع لرغبات "نينا" الدفينة.. وارتدى البالطو فوق القميص.. لأبدأ في التحول إلى أحد أشهر شخصيات "الدى سي كوميكس".."الجوكر".

#حتروح_منى_فين_يا_مازنجر

#انا_اكره_السيرك

#فقرة_الساخر

#اعترافات_بنت_حرام_صحيح

#انا_موتضايق_يا_نيلة

#_عماد_حمدى_كان_اسد_انه_استحمل_نينا

الاعتراف السابع

يا جماعة.. ده مش اعتراف بالمعنى الحرفي للكلمة.. هو أقرب لأنه يكون رسالة اعتذار لـ "أماما" ولكل الأمهات جميعًا ربنا يديهم الصحة..

أما تكون فيه أم عندها من الأولاد ثلاثة.. وبتربي معاهم الأب كمان باعتباره ابنها.. يعني تقريبا بتربي أربعة رجاله في المنزل.. بيكون مشكلتها الأساسية في حاجتين لا تالت لهما..

المشكلة الأولى: الزى الصيفي الرسمي

كما تعتمد وزارة الداخلية على تغيير أزيائها من شتوي إسود إلى صيفي أبيض.. يلجأ الشباب في عمر البغال اليافعة إلى نفس الاستراتيجية.. وخصيصًا في فصل الصيف

طبغًا وكما هو معروف عند الصبيان معدومي الحساسية.. إن الزى الرسمي في الموسم الصيفي.. غالبا ما يكون زي صيفي.. صيفي قوى.. صيفي لدرجة "مثيره"..

مجموعة من العصا عيص تجوب أرجاء المنزل كالأشباح
الطائفة.. مرتدية الزى الأبيض المكون من الفانلة الحمالات..
والسليب الاسبيدو الأبيض ماركة جل.. قبل اكتشاف الامبراطور
وبوكسراته.. الذى جعل للحياة لونًا بدلاً من الأبيض "المزهر"..
الي مدي على مزرق ٥٥..

شكوى لا تنقطع عن الأمهات جميعًا باختلاف الوانهم..
لهم الجنة تلاقهم بيقولو..

"يا حبيبي البس كده حتبرد"

"أماما الدنيا حر"

"يا حبيبي في اختراع اسمه البيجاما"

"أماما الدنيا حر"

"يا حبيبي عيني وجعتني من أشكالكم المقرفة"

"أماما البسى نضارة شمس الدنيا حر أماما"

وانت واخواتك طبعًا.. اللي تنام بيه تصحى بيه..

الشباب في هذه المرحلة السنية بتكون في مرحلة اكتشاف
القدرات الذاتية.. وأهمها القدرة الذاتية على البجاجة..
تتساقط أوراق التوت عن السواد الأعظم من الشباب.. ويبدأ
في التعامل مع العالم على إنه حمام ثلاث كبير متواصل طوال
ايام الاسبوع..

إيه ذنب المكوجى القادم من الشارع إنه يشاهد عضلات
الفخدة الأمامية؟؟؟

إيه اللي يهيم السيد محصل الكهرباء في تكوين فكرة عن
تلك الشعيرات التي بدأت تنمو على صدرك والي انت بتفكر
جديا إنك تضفرها؟؟؟

تفتكر بجد إن بواب العمارة حيزيد احترامه ليك لما يعرف
انك من النوع اللي بيدخل حرف الفانلة جوة السليب؟؟

أسئلة لن تجد لها إلا إجابة واحدة لا تتغير

"أماما.. الدنيا حر أماما"

المشكلة الثانية : إنهم يأكلون كل شئ متحرك أو ثابت

مرحلة النمو.. عند السادة مرتدي الزي الابيض الثنائي
القطعة.. تصاحبها مرحلة من التوحش..

افتكر أماما ربنا يديها الصحة.. ماكانتش بتلاحق على
أكلنا..

واحد داخل البيت والثاني خارج والثالث قايم من النوم..
والرابع جاى من الشغل "اللى هو أبابا".. ومولد بقى.. والكل
على نغمة واحدة..

"فين الأكل يا ست انتى؟"

كانت الله يمسيها بالخير.. على وشك إنها تبدأ تعملنا
الأكل في بستلة عشان الكميات... وبالنسبة للشرب.. أحيانا
البانيو مكنش بيكفى.. وكانت الكميات المطلوبة هي نفس
الكميات اللي بتحتاجها باقي شقق المنطقة كلها تقريبًا..

الموضوع بفضل الرياضة واللعب والمرواح والمجى.. اتحول
من سد جوع إلى إشباع فجع.. البطون طول الوقت محتاجة
تتملي بالأكل.. وكأنها بتسرب الاكل زي تسريب المكالمات بتاعة
عبرحيم علي كدة..

وأماما الله يديها الصحة.. مش ملاحقة..

الهجوم على التلاجة يومياً كان استراتيجية عصابة العصايعص
البيضاء للفتك بأس شيء يحتمل الأكل أو لا يحتمل كمان.. مش
فارقة.. أرفف التلاجة عليها علامات تدل على نشوب معركة
بالاسنان داخلها.. وبابها عليه الخدوش اللي بتوضح ان كان في
ديب جعان زارها منذ فترة قريبة..

في بيتنا.. كان البقاء "للي يلحق"..

أبأبا كان بيعحب "التين الشوكي" جدا.. وكان بيشتري في
الصيف.. بتلاتة جنيه ايام ما كانت اجدها تينة بخمسة ساغ..
بمجرد إنه يحطهم في التلاجة عشان يسقعوا ويتغدى.. بح..
بس خلاص

وطبعًا.. الهتاف الأشهر في تاريخ البيت..

"مين الحيوان اللي أكل التين؟؟؟؟؟؟؟؟"..

الإجابة صمت مطبق..

فكان بيوصل لمرحلة العند إنه لازم ياكل إن شالله "تينة
واحدة" قبل ما يتوفى.. فبدأ في إنه يجيب بخمسة جنيه.. يعني
ميت تينة!!... وبرضو بيكون مصيرهم نفس مصير ما سبقهم..
ويتردد الهتاف مرة تانية..

"مين الحيوان اللي أكل التين؟؟؟؟"

الصمت المطبق هو المجيب دومًا..

فا يزود بقى أبابا لحد ما وصل إلى بعشرة جنيه تين..
وقعد يزود يزود يزود..

وبحمد الله.. في النهاية.. وقبل وفاته رحمه الله.. يأس
أبويًا إنه يدوق التين من الأساس جوة البيت وبطل يشتري لنا
خالص..

مشاهدات

- أماما كانت بتحط الأكل أحيانًا.. وتخش تستخبي في
المطبخ حتى لا تشاهد معركة السباع على الطعام.. وخصوصًا
مرحلة وضع الأطباق على الأفواه مباشرة..

- أبابا.. كان بيشتري بجنيه تين ويقف ياكله على العربية
وبطل يجيلنا فوق

- لولا وجود فصل الشتاء.. لكنا عممنا الزي الصيفي على
الشعب بالكامل في الشوارع أنا واخواتي..

#كان_نفسى_اخلف_بنات

#طوي_ابابا_وتينة_كمان

#سامحيننا_يا_اما

#لك_الجنة_انت_وكل_الامهات_وانا_شاهد

الاعتراف الثامن

في حد ما كانش ليه هواية وهو صغير؟؟؟
كلنا كان لينا هوايات.. الي بيرسم.. والي بيغنى.. والي
بيربي حيوانات..
أنا كنت بحب أربي حيوانات قوي..
طبعا الكل بسذاجته.. حيعتقد إن الحيوانات الي ممكن
تتربي زي الكلب والهرة.. "القطة" يعني..
لالالا.. انسوا الكلام ده خالص..
لولا استحالة دخول الايغال من باب الشقة.. ولولا طول
رقبة الزرافة مقارنة بالسقف.. كنت ريبتهم..
في لحظة من لحظات الزمن.. قررت أربي "تعبان".. أيون..
"تعبان".. بعد ما اتكلمت عنه أنا وواحد صاحبي.. وقالي

وعادلي على قد إيه هو جميل وقد إيه هو حيوان "أليف"..
آه والله أليف..

وخصوصًا بقى اما شرحلي إن التعابين ممكن تشتريها
منزوعة غدد السم.. ومنزوعة الانياب كمان..
ده من أجل مزيد من الاطمئنان..

طبعا.. أنا مكذبتش الخبر.. وقررت أنزل سوق الإمام.. إلى
حيث بائع التعابين..

"يا عم يا عم.. عاوز تعبان.. من غير سنان"

الدنيا كانت زحمة موووت في السوق.. فين وفين.. أما
الراجل إداني التعبان.. أخذته مسكته بحذر كأول تعامل وتعارف
بيني وبين التعابين غير السامة.. وحطيته في علبة خشب من
عند الراجل صغيرة كدة..

وبدأت رحلة العودة إلى المنزل.. عبر ركوب أتوبيس
سبعومية وواحد "المطبعة - العباسية"..

التعبان فضل محترم جدا جدا طول الطريق من السوق
لحد محطة الأتوبيس.. وعشان اكون اكثر تحديدا.. كان محترم
لحد ما طلعت الأتوبيس..

وهوووووب... هو ركب الأتوبيس من هنا.. وكأنه ركب
عفريت.. حتى التعبان قرف من الأتوبيس.. والله احنا لينا
الجنة..

خرج التعبان من فتحة العلبة الخشب.. ووقع في الأرضية
المزيتة..

وطبعاً.. أنا كان دوري في هذه اللحظة.. هو "السحف"
تحت الكراسي.. والجري ورا التعبان والامساك به.. لحد ما
ربنا وفقني.. ومسكته.. و"دسيته" بسرعة في العلبة الخشب..
ونزلت مع الناس أكنى مش تبع الأوتوبيس..
طبعاً لو كانوا مسكوني أو عرفوا إني صاحب التعبان.. كانوا
حطوه في.. ما علينا..

وصلت إلى البيت بفضل الله.. وطلعت.. وطبعاً.. كان لازم
أتأكد إن أماما وأبابا مش قاعدين في الصالة.. اتسحبت وأنا
داخل.. لدرجة إن التعبان كان حيقولي:
"يا ابن اللعيبه.. بتتسحب أحسن مني"

ومسافة ما دخلت.. وبقيت في نص الصالة.. جاء أخويا..
ومن وراه أبابا.. ومن وراه أماما.. ومن ورائهم أخويا الثاني..
وفجأة لعبت الصدفة أقذر أدوارها.. وتحولت صالة بيتنا
بقدره قادر إلى ميدان عام يلتقي فيه الكل من كل مكان..
ماكانش ناقص غير إني الاقى عربية حلبسة معدية في
طريقة بيتنا..

والكل سبحان من له الملك.. سألوا سؤال واحد..

"ايه اللي في العلبة ده؟؟"

طبعاً.. أنا قلت اعترف.. واقنعهم.. وخصوصاً إني بعد ما
اشرحلهم الموقف وإن التعبان اللي اشتريته عشان أربييه في
البيت معانا منزوع السن ومنزوع السم.. ممكن يقتنعوا.. ودى
كانت أكبر غلطة في التاريخ المعاصر..

رفعت سماعة التليفون.. كلمت صاحبي في البيت اللي
قالى على موضوع التعبان.. رد عليا.. فهمني إن التعابين بتبقى
منزوعة الغدد السامة.. إنما مش منزوعة الأسنان دايماً.. وبتتباع
على كدة.. بعد ما قفلت معاه.. سألتنى أبابا بسرعة..

- قالك ايه؟؟؟

فكرت للحظة.. وقتله مباشرة..

- قالى احتمال كبير تموت..

راحت أماما بقت تصااااااااااااوت

وأبابا رجع يجري في الشقة مش عارف يعمل ايه..

وإخواتى رجعوا يعيطوا..

ما أنا لو قتله التعبان مفيهوش حاجة.. كان أقل حاجة
حيعملها إنه حيقنقى بيه..

ملمت شتات نفسي... حلوة ملمت دي..

ودخلت الصالون.. مسكت التعبان بعصايا.. حطيته في
كيس.. واخذنا التعبان أنا واخواتى وأصحابنا.. نزلنا بيه الميدان
تحت البيت.. وتناوبنا الإعتداء عليه.. حتى لفظ أنفاسه الأخيرة
متأثراً بجروحه.. حطينا عليه جاز وولعنا فيه.. كنوع من أنواع
التمثيل بالجثة عقاباً على ما اقترفته من خطأ العض..

ومن ساعتها..

أماما ما بطلتش تصااااااااااااوت

ولا أبابا بطل يجري في الشقة مش عارف يعمل ايه..

ولا اخواتي بطلو عياط..

احتجت إلى شهور من التعافي النفسي من آثار الشتيمة
اللي أبابا شتمهالي..

أماما احتاجت إلى شهور من التعافي النفسي من آثار
رؤيتها التعبان وهو داخل الصالون يدلع يملا القل.. وقعدت
تصحى كل يوم بليل وتصااااااااااوت..

اخواتي بقى قرررو يشتركوا معايا.. ونشترى "نسر" نربيه
في البلكونة..

هع هع هع هع

ولكن.. تلك اعترافات اخرى..

#السلم_والتعبان_والاوتوبيس

#ثعبان_غير_سام_زى_دم_لونه_اخضر

#هوايات_مفيدة_للقتل

#انتظار_الموت_مرعب_حقيقة

"نعم أبابا؟!!!"

"انزل يا حيوان انت وهو بسرعة.. خد الكيس ده.. وامشي ورا الراجل اللي لسة حاطه دلوقتي.. وامشو وراه لحد بيته.. وسيبه هناك قصاد عمارته وتعالى.. حيخلو الميدان خرابة" عزيزي القارئ.. اسرح بقى..

مرة الراجل يحط الكيس ويطلع ساكن على بعد 10 كيلو مثلاً.. ونازل يرمي الكيس ويتمشى..

"يا شرييييييييييييف"

"حاضر أبابا؟!!!"

مرة ست تحط كيس ونشيله ونمشي وراها وتطلع شغالة كانت بتنصف شقة ومروحة.. ونحتاس بالكيس ما نعرفش نوديه فين أنا والعيال اخواتي ونركب بيه ميكروباس ونروح.. وركاب الميكروباس تشتمننا على القرف اللي شايلينه.

"يا شرييييييييييييف"

"حالا أبابا؟!!!"

مرة واحد يحط الكيس ويمشي شوية نقوم نمشي وراه.. يركب عربية ويمشي نقوم نجري وراه بالكيس..

"يا شرييييييييييييف"

"فوراً أبابا؟!!!"

مرة تلاقى الكيس مقطوع.. فتتعلم بعد كده تنزل من البيت معاك كيس احتياطي عشان تلم فيه الزبالة اللي

حتدلق وتكمل مشوارك ورا صاحب الكيس إلهي يحرقه هو
والكيس في ساعة واحدة..

"يا شرييييييييييييييييييييييف"

"في التو أبابا؟!!!"

مرة عقبال ما تنزل تلاقى الكلاب الضالة حاصرت الكيس
حصار الإغريقيين لطروادة وهى بتبصلك ولسان حالها بيقولك..
"لو دكر.. قرب من الكيس.. وحيكون مصيرك مصير
هيكتور"

"يا شرييييييييييييييييييييييف"

"consider it done أبابا؟!!!"

وهكذا..

كانت تلك المرحلة.. قد حولتنا إلى رجال مطافي أنا
واخواتي..

نايمين نص نومة..

مغمضين عين ومفتحين عين..

لابسين دايمًا.. ومستعدين.. منتظرين للنداء الذي لا ينقطع

"يا شرييييييييييييييييييييييف"

"افنظم أبابا؟؟?"

فكرنا أنا واخواتي نعمل عامود من البلكونة نتزحلق عليه
من الخامس.. بس الفكرة ما تمتش..

وبرضو.. الناس اللي بترمي الزبالة ابتدت تتعلم هى كمان
ان في "زبالين" بيحرسوا الميدان..

فبدؤوا في مرحلة جديدة..

يحطوا الكيس.. ويجروا.. عشان منحصلهمش..

"يا شرييييييييييف"

يحرق شريف على أكياس الزبالة في ساعة واحدة.

"شريف بيجري أهو ابابا"

غيرنا الاستراتيجية.. وابتدينا في مرحلة جديدة.. اننا نستخبي
في الشارع للناس اللي بتحط الزبالة عشان عنصر المفاجأة..
ونطلعهم من اللا مكان زي الأرواح الشريرة..

فبدأت مرحلة أجدد..

الناس تعدي بالعربيات وترمي أكياس الزبالة من شبك
العربية.. وتخمس بالعربية و"تأمرك".. وتنطلق انطلاقة عربيات
السباق في آخر خمسين متر لسباق بارييس دكار الدولي..

"يا شرييييييييييف"

قووووم ايه.. شريف واخواته وعلى خدودهم آثار الدموع
من التعب.. لابسين الخوذ ومحضرين العجل البي ام اكس
بتاعهم.. وطالعين خاطفين كيس الزبالة قبل ما يلمس الأرض
على طريقة شروخان في الأفلام الهندي وطالعين ورا العربية
بالعجل..

وهكذا استمر أبابا

الاعتراف العاشر

طبعا كل واحد خلقه ربنا.. ببقى ليه شئ مخيف في خياله..

في ناس بتخاف من الكلاب.. وفي ناس بتخاف من العفاريث.. في ناس بتخاف من التعابين.. طبعا مش أنا خالص اللي بخاف من الحاجات دي.. حتى راجعوا الاعترافات السابقة..

في يوم من أيام الاجازة الصيفية اللي انقطعت فيها العربية زي ما الست فيروز الله يمسيها بالخير دايما ما بتقول.. كنت أنا وأصحاب الميدان عشرة العمر.. بنلعب كورة من الصبح لحد الظهر.. أجازة بقى وكنا لينا حوالى ستاشر صديق مقرب وجيران ميدان واحد.. متربين سوى.

سبتهم في وسط اللعب وطلعت.. مبلول مية من العرق طبعا.. قررت آخذ دش.. ودخلت الحمام.. سلت هدومي

الاعتراف الحادي عشر

طبعا في يوم الخامس و"العشرين" من يناير لعام الفين و"...اشر" حط انت بقى الحروف اللي تحبها.. "حد".. "اتن".. "تلات".. "اربعث".. اليوم ده هو كان وسيظل يوم الاحتفال بيوم الثورة المجيدة..

"مجيدة دي تبقى مرات مجدي"

كتير مننا فاكر الميدان.. وأيامه الجميلة.. فاكر الملايين اللي كانت بتنزل تدور على بلدها اللي ضايعة ما بين دول ودوكهوما.. وطبعا أما تشوفو حلمة ودانكم لا حقولكم مين دولا.. ولا مين دوكهوما.. بلا نيلة.. "عفوا سيدي المراقب".

في يوم.. كنت مثل الملايين التي خرجت للميدان.. الميدان لا موضع فيه لقدم.. خارج من شغلي.. متفق مع أفضل من عرفت من البشر وأنقاهم.. مجموعة أصدقاء الميدان.. نتوجه

إلى الميدان سوياً.. حيث محاولة الوقوف ضد ممارسات كل اللي
خربها.. واللي لسة عاوز يخربها

في منكم حيقول أيام المجلس العسكري.. هع

وفيه منكم حيقول أيام حكم الإخوان.. هعين..

كل واحد يفتكر اللي عاوز يفتكره.. لأن مش ده المهم..
المهم إن الشباب كان دايمًا موجود في وش الظلم بكل أنواعه..
أي ظلم.

طبعاً لى ما راحش الميدان اثناء امتلائه.. في بعض
المشاكل اللي ممكن تمر بها.. وممكن تتجاوزها.. وفي مشاكل..
بتحاول تتجاوزها..

بس للأسف.. القدر بيوقف بكل قوته ضدك.. زي ما
حصلي فجأة..

لقيت نفسي.. من صباحية ربنا.. في عز الصيف..

شارب اتنين قهوة في الشغل.. وتلاتة شاي.. وازاتين مية..
وواحد ينسون.. وكانزتين ببس وواقف في وسط الميدان بقى
عامل زي فنظاس المية اللي على عربية نقل.. حدلوق بيبيى
من بوقى.. ومحتاج أدخل الحمام.. فوراً.. بدون تأخير

جربيببيت على مكان المراحيض العامة اللي في الميدان..
اللي كنت اتخيلت مرة انها مفتوحة زمان قبل الثورة.. اما
وصلت للمكان بعد محاولات عدة وسط الحشود الرهيبة..
وسط عبارات كتير على شكل..

"محدث يرجنى"

"ما تضغطش عليا أرجوك"

"وسع من قصادى بدل ما تتبل"

كانت المراحيض عبارة عن أنقاض..

طبيعي.. لو كل واحد من البشر دي نزل نقطة "عرق"
حتى على المراحيض.. الحيطان حتبوش!!!

البيبي أمام باب المراحيض المغلق.. كان بيعكس ضوء
القمر من خلال ارتفاع منسوبه خارج المراحيض أصلا..

ومن جهة اخرى الرائحة كانت واضحة على جتت البنى
ادمين الي اترمت جنب المراحيض نتيجة التسمم الدموى
الناجم عن استنشاق سادس أكسيد البول..

الخلاصة.. كان في مجزرة بشرية في المنطقة دي.. الفكرة في
حد ذاتها إني أقرب كانت مرفوضة تمامًا.. عقلي الباطن جاب
سيرة أهلى لمجرد التفكير..

وفي الوقت الي عقلي الباطن رافض الفكرة.. كانت المثانة
بتقولي..

"بشوقك بقى.. أنا مستحملك.. ومستحمله قرفك إنت
وعقلك الزفت الباطن.. بس مش حستحملكم أكثر من كدة..
أنا عاوزه اطلق"

بعد المحايلة.. والوعد بالجواز..

قلت أيوووووة.. صح.. مفيش غير كنتاكي.. وهاتك يا هرس
وسط حشود البشر مرة تانية.. وصولا لكنتاكي..

- يا أخ الله يكرمك.. ما ترجيش بجد.. أنا ماسك نفسى
بالعافية.. رجة كمان وحفور زي ازازة الكازوزة.

وصلت لكتناكي.. اللي كان أذكى منى بكتير.. الحمام مقفول
طبّعًا.. لأنهم معندهمش أي استعداد ان حمام كتناكي.. يبقى
زي المراحيض اللي برة..

مفيش حمام..

طب أرجع المراحيض بقى..!! !!

عقلي الباطن: مش حيحصل إلا على جثتي

المثانة: ابقى خللي زفتك الباطن يخزن هو بقى البيبي
يا روح ستك

محاولًا الفصل بين السلطة العقلية والسلطة الإخراجية..
توجهت إلى الشارع زي المجنون.. أبص يمين.. أبص شمال..
أعمل إيه يا ربي..

خلاص.. على الترتووووووفة.. مش قادر..

أيوة.. يا ربي.. بيت ربنا.. الجامع.. الميضة..

- فين أقرب جامع يا عم ابوس إيدك..

- ورا هناك يا ابني

زحفًا للجامع.. وأنا قافل رجلى منعًا أي تهريج بايخ من
المثانة.. وعقلي الباطن منفضلي تمامًا.. وصلت إلى الجامع بحمد
الله..

لكن..

الجامع قافل..

لييييييييه "صرخة شوير"

الساعة تسعة.. صلاة العشا خلاص.. وقفلوا الجامع..

أروح فين بس الساعة دي يا ربي...???

هوووووووووووووووووووووووووووووووب..

المثانة اعلنت انقلابا عسكريا على عقلي الباطن..

اوسكوت يا ابن الوارمة...

أصلا أنا ما كنتش حلحق أرجع للمراحيض..

أفكار كثيرة جاتنى أثناء آخر نفس في مقاومتي للمثانة..

فكرت أعمل زي محمد هنيدي في رمضان أبو العلمين

حمودة.. وخلاص.. وأقول إزازه مية وقعت على رجلي.. وخلاص

بقي.. محصلش حاجة

بس عقلي الباطن رفض.. واحتفظ بأخر ما تبقى له من

كرامة.. رافضاً هذا المبدأ.. قبل أن تقوم مثانتى بغزه بالسكينة

في ظهره وهو واقف يخطب خطب رنانة.. وتعلن سيطرتها

على مجريات الأمور بعد اغتيال عقلي الباطن تماما..

وكان اول بيان إذاعته المثانة من "مازيرو"..

"جنب الحيط يا حبيبي.. اعمل بيبي حفاظا على ملابسك

الداخلية.. وإلا سيضطر المجلس السمكري إلى فتح كل قنوات

الاتصال على مصرعيها مما سيؤدي إلى غرق البلاد في مياه
الفوضى.. ومحدث حينفعك"

بلا وعي.. اتجهت إلى الحائط.. وبصيت ليه.. وكأني بقوله..
سامحني.. أنا مش كده

وهوووووووووووووووووووو

- انت عاوز ايه يا ابني؟؟؟ "واحد معدى"

- دورة مية إلهى تبقى رئيس الجمهورية..

- طب ما تخش دورة الجامع..

- الجامع قافل أهو يا حج..

- دورة المية مش جوة الجامع.. بص خشله..

أنا كنت أساسا جوة وهو بيقول الجملة اللي فاتت في
أقل من "سيت خطوات" متجرداً من كل شئ.. محولاً دورة
مياه الجامع إلى فرع من فروع المراحيض العامة اللي موجودة
في الميدان من أجل قتل الثوار بالغاز

أكرمنى ربنا وفكيت زنقتي.. واتعلمت حاجة مهمة جدا..

بعد كده يا حبيب قلب بابا.. أما تيجى نازل ميدان
التحرير.. في ثورة بقى في فسحة في شنطة خضار

يا تكون عامل كل البيبى اللي في التاريخ اللي ممكن
يتعمل..

يا تاخذ معاك عبوات بامبرز مقاس المسنين!!!

#مراحيض_مراحيض_نقول_لسة

#العقل_في_مواجهة_الجسد

#المجد_كل_المجد_للبيبي

#بامبرز_المسنين

لحد زي ما انتو عارفين طبعًا.. يوم من الأيام الغبرة اللي
ما طلعتلوش شمس.. جاني فيه "حسن" صديقي وقالي..

- شريف.. رانيا عاوزه تتعرف عليك

- رانيا مين؟؟ رانيا علواني؟؟ بطلة السباحة؟؟؟

- يا ابني رانيا لطفي.. أحلى بنت في النادي؟؟؟

- إيه ده هو النادي بتاعنا ده فيه بنات؟ كويس والله!!

- بتهرج؟؟!! ده نص النادي يتمنى تصبح عليه بس!!

- معقول؟؟؟ والنص التاني يتمنى تمسي عليه.. صح؟؟؟

شربات انت ياض.. شربات

- لا لا.. إنت اكيد مجنون.. أنا أساسا أما كلمتني عليك

كان حيغمي عليا!!

- ليه؟؟؟ كانت واكله بصل؟؟؟

- يووووه.. بص.. تعالى شوفها عاوزه ايه.. وياكش تولع في

نفسك بعدها بقي.

وتحت الحاح صديقي اللطخ "حسن".. وتهديده ليا بأنه

يحذف نفسه تحت عريية زبالة اذا رفضت أشوفها عاوزه

ايه؟؟؟ وتتعرف عليا ليه؟؟؟ رضخت.. إنما مش رضوخ كامل

طبعًا..

توجهت.. للجوينية.. وأنا في كامل رونقى.. شورت منتخب

الأرجنطين بتاع السبعينات اللي كان مفتوح من الجناح لحد

الصرة.. والفانلة.. "مش تيشرت" على أيامنا كان اسمها فانلة

الكورة اللي ياقتها لو اتفردوا زيادة وانت بتجرى.. احتمال كبير تطير.. أو إن الياقة تلطش الواد اللي بيجرى جنبك بالقلم على وشه.

الخلاصة.. كان منظرى يمّوع نفس كلاب السكك.. ولكن.. هو ده اللي موجود.. وأنا مش بتاع وجع القلب ده أصلا.. أنا فكرت أروح اقولها..

"قصرى عشان عندي فورة من ستة حبتدي كمان ربع ساعة" ..

إمّا قلت برضو مفيش مانع من شوية لباقة وكياسة..

دخلت عليها وهى قاعدة وسط صاحبها اللي بالنسبة لشباب النادي.. كانوا البستان المشرق.. وملتقى العيون كل ليلة.. طبعا كل اللي شافني داخل أكلهما.. كان متأكد انى أخرى أكون جاييلها بجنيه ترمس وبنص حمص من غير ملون من على العربية.

- مساء الخير يا رشا..

- احم احم.. مساء النور.. أنا اسمى رانيا..

- اه.. سورى معلش.. ازيك.. عاملة ايه؟؟

- تمام يا شريف والله.. انت أخبارك ايه؟؟

- لا تمام الحمد لله.. لسة كسبان فورة من أربعة من

نص ساعة يا رنا والله..

- مبروووووك.. أنا اسمى رانيا على فكرة..

- خدماتك رانيا ! المعادي كلها عارفة ان اسمى رانيا !
- سيبك من الاسم.. قوليلي إيه المشكلة وبعدين حنتصرف
في موضوع الاسم ده..
- شوقي..
- ياااه.. شوقك ليا هو المشكلة؟؟؟ ازاي مش فاهم..
وضحيلي الله يكرمك عشان أنا متلخبط
- يا ابني شوقي.. شوقي صاحبي..
- شوقي مين؟؟؟
- امممم.. شوقي ده..
وشاورت بإيدها ناحية المطعم اللي الناس كانت بتشتري
منه الأكل..
- فين ده؟؟؟ اللي واقف بيشتري من المطعم ده؟؟؟
- لا.. اللي قدامه..
للاسف الشديد.. شوقي ده طلع "المطعم" نفسه.. شوقي
ده هي مسمياه كدة.. إنما هو كان مشهور في النادي باسم
"الونش".. شوقي كان بياكل عيال كثير كل يوم.. وكان بيسندو
بيه الشجر اللي ماييل..
شوقي كان بيوطى جامد عشان يدخل من باب النادي..
وكان معموله خط سير معين في النادي عشان ما يدوسش
العيال الصغيرة اللي راكبة عجل من غير ما ياخذ باله..!!!

شوقى ده كان النادى كله.. وتقريبا المعادى كلها.. واحتمال
شبه الجزيرة الهندية كانو عارفين إنه مصاحب رانيا من سنين
طويلة.. كتب التاريخ مكتوب فيها كدة.. وان أي محاولة لتغيير
الواقع ده.. بيبكون نهايتها عاهة مستديمة.. أو اسم يضاف إلى
طلبات استخراج تصاريح الوفاة.. في خانة "المتوفي"

أتذكر إن آخر واحد سمعت انه حاول يتعرف على رانيا..
أهله سفروه يكمل علامه برة عشان يفضل عايش.. بعد ما
شوقى كان حالف ياكل طحاله..

- طيب.. فرصة سعيدة يا رأفت..

- رأفت مين؟؟؟

- لا مش مهم الاسماء خالص دلوقتي... انتى عاوزه منى
حاجة تانية؟؟؟!!!

- يا شريف يعني هو أنا غلظت اني عاوزه اتعرف
عليك..؟؟؟

إيه الإحراج ده بس؟؟! أقولها إيه دلوقتي؟؟! ماهى أصلها
مش حتتفعني أما يكون "شوقى" السبب الرئيسي في إني أتجه
لممارسة رياضة كرة الجرس بتاعة المكفوفين بعد ما يفقدني
البصر من الضرب...!!! ! إنما برضو نظرة عنيتها كلها توسل..
وكأنها الأميرة المحبوسة في البرج العالي اللي مستتية بتاع الكنافة
يجى ينده من تحت البرج عشان تدلله السبت..

همممم..

- طيب برضو يا رضوى.. مقولتليش إيه المطلوب؟؟

- بص.. أنا كا "رانيا".. مش عاوزه حاجة غير إنك ما
تبقاش خايف منه ونقعد مع بعض نتكلم عادى.. بس كدة..
فيها حاجة دي؟؟؟

- بصراحة لأ.. عادى يعني.. أصدقاء مفيهاش حاجة..

- خلاص.. نتقابل بكرة هنا في نفس المكان بقى..

- خلاص اتفقنا يا روقية..

- رانيا

تاني يوم.. اضطريت أعتذر للعيال اللي بلعب معاهم
الفورة اللي من اربعة.. ووراهم الفورة اللي من ستة..
واعذرت للشباب اللي بنزل معاهم حمام السباحة الظهر..
واضطريت ألغي ماتش البنج بونج.. وكلمت الكابتن استسمحه
اني ما روحش تمرين الجودو..

ونزلت من البيت.. في كامل تأنقي بقى..

المنطلون الكلاسيك اللي واسع من فوق ونازل على ضيق..
والقميص الأزرق.. والشاكت الذى يجعلنى فاتنا زي رفعت
اسماعيل قبل ما يتهرس في آخر اسطورة.. الله يسامحك يا
دكتور أحمد

وتوجهت إلى النادي.. عشان أقعد أرغي معاها في أي كلام
تافه.. وأنا داخل على النادي وقربت خلاص.. كان في مشكلة
واحدة كل تفكيرى..

هى كان اسمها ايه؟؟!! اسم...

- اجرى يا شرييييييييييف

- في ايه يا حسن!!!!!!

- اجرى يا شريف.. شوقي عرف انك مصاحب رانيا
وحيقتلك..

- مصاحب مين؟؟؟ رانيا مين؟؟؟

- رانيا لطفي يا شرييييييييييييف

- لطفى مين؟؟؟ أنا مش مصاحب حد اسمه لطفي... أنا
رايح اقعد في النادي مع واحدة نتكلم بس!!

- الي وصل لشوقي انها خلاص سابتة عشان تتعرف عليك
بعد انت ما قولتها عنه إنه "بغل" وعقله فاضي.. وجسمه
جسم تور إنما عقله عقل "دبانة".. وإنه معدوم الإحساس
والرومانسية وإنك حتمسح بكرامة أمه الأرض!!

- إيه معدوم الفروسية دي!!!

- رومانسية.. رومانسييية.. يعني حلوف..

- أنا مقلتش عليه حلوف.. هو الي مولود كدة.. مين
الي قاله الكلام الفاضى ده..؟؟

- رانيا..

وهنا.. فهمت أنا بقى اللعبة.. وفهمت ان إلى ما تتسماش..
اختارت تغيظ "التريناصور ريكس" الي مسمينه شوقي ده..
بالشخص الوحيد في النادي الي مش فاهم تقريبا.. وممكن
يوافق.. وطبعًا.. نجحت خطتها تماما في إنها تغيظ شوقي..

الضربة الأولى.. نزلت على الرصيف بعد ما تحركت بسرعة
النحلة يمين.. هتكت عرض الرصيف..

الضربة الثانية.. نزلت على الهوا.. لاني ساعتها.. كنت على
حدود ليبيا..

شوقي نفسه انبهر إن في كائن بيتحرك بالسرعة دي..
وشهود العيان.. أقسموا إن كارل لويس لو كان شاف "الاسبرنت"
ده.. كان قعد في بيتهم يشتغل تريكوه..

قبل ما شوقي يلبس الحزام.. كنت أنا في البيت..

بعد مرور أسبوع وأنا مستخبي في درج المعالق بتاع
"أماما".. كان صحابي ضغطوا على رانيا إنها تعترف للغواصة
الي ماشية معها بالحقيقة.. وفعلاً.. قالتله..

الحمد لله.. شوقي شالني من دماغه..

وأنا الحمد لله.. ما دخلتش الجوزينة تاني لمدة عشر سنين..

#الله_يسامحك_يا_راضية

#مممكن_الكتالوج_بتاع_صاحبك_عشان_نشغله

#شوقي_بينام_في_بيت_الزرافة

#اللي_عاوذة_تتعرف_عليا_تمضى_كمبيالات

#سحقا_للتعارف

#ان_كيدهن_عظيم

#حتروحووا_من_ربنا_فين

الاعتراف الثالث عشر

فترة الخطوبة.. ياااااااه ياااااااه على فترة الخطوبة.. الدنيا
كلها حلوة وجميلة.. العريس رايح.. العريس جاى.. العروسة
مستنية العريس.. العروسة خرجت مع العريس..
العريس جاى يزور أهل العروسة...
امسك..

طبعا أنا كشاب فخور بنفسى جدا.. لازم أما أكون رايح
عند أهل العروسة.. أكون ملو هدومى كده ولابس ومتازع..
ويكون الواحد مُتألق كدة.. عشان يبقى حلو فى عين عروسته
وأهلها..

كما هم الشباب الخُطاب.. اتعزمت عند أهل خطيبتى..
على الغدا.. طبعا الكوارع والحمام المحشى والرز بالخلطة

والمملوخية.. سيكونوا في انتظاري على مأدبة الطعام.. حاجة
تفتح النفس..

وصلت عند العروسة.. ودخلت.. سلمت على أهل البيت..
والعروسة كما هي عادتها.. متألفة تألق الشمس في يوم شتوي
بلا غيوم.. حاجة كده مريحة للنفس..

ريحة الأكل اللي جاية من المطبخ.. تخبل.. أنا مش حقدر
أقاوم مرحلة إنهم يعزموا عليا واعمل نفسى مش قادر أكل
والحركات القرعة دي.. أنا غالباً حعضعض في الأطباق الفاضية
لحد ما الأكل يجى.. وحعمل سندوتشات مفارش سفرة
- "الله.. أومال فين عمى؟؟?"

سؤال طرحته أما لقيته مش موجود.. وعرفت إنه في
مشوار وراجع حالأً وعلى وصول اهو.. - "انت مش غريب يا
حبيبي.. وانت واحد من البيت"

والكلمتين اللي لازم تسمعهم من كل الحموات اللي بيجبوا
عرسان بناتهم..

جميل قوي.. يا رب يتأخر عشان آخذ منابه من الرز
بالخلطة.. "عقلي الباطن المفجوع"
المهم..

- "العروسة فين يا طنط؟؟؟ في المطبخ يا حبيبي.. ست
بيت شاطرة.. واقفة واختها معاها بتساعدھا.. هي اللي عاملة
الأكل ده كله"

برضو نفس البوقين اللي لازم تسمعهم في أي جوازة.. بغض
النظر إنك في خلال الأسبوع الاول من الحياة الزوجية بتتأكد إن
معرفة مراتك بالمطبخ هي نفس معرفة العصفورة عن كيفية
تركيب القنبلة النووية!!! غريبة!!! ما علينا..

المهم.. قاعد في أمان الله.. في انتظار الولايم الممدودة..

وهوووووووووووووووب

سرييييييخ رهييييييب... صادر من المطبخ..

فيه إيه؟؟؟ القنبلة النووية انفجرت؟؟؟ قصدي البوتجاز
انفجر؟؟؟ في حاجه يا جماعة..

العروسة وأختها وأمها.. خارجين من المطبخ هربانين
هروب المساجين من سجن وادي النطرون.. ما بيصوش وراهم
أساسا..

"في إيه يا جماعة.. في إيه أنا كده اتوغوشت..؟؟؟ في حاجة
حتنفجر طيب؟؟؟"

كنت منتظر طبعًا.. إني أسمع إنهم اكتشفوا وجود 750
طن من المتفجرات على باب المطبخ معدة للانفجار..

كنت منتظر أسمع إنهم اكتشفو وجود مقابر جماعية
للحمام المحشى في فرن البوتجاز.. كنت منتظر إني أسمع إنهم
اتفاجئوا بالتمثيل بالكوارع في حلة الضغط "البرستوم"..

لكنى مكنتش منتظر أبدًا أبدًا أبدًا.. إنهم يبلغوني إن فيه
كائن حي في المطبخ..

مبدئيا لو كان فار.. أنا كنت حاخذ بعضي وأروّح ويا دار
ما دخلك شر.. وربنا معاكم يا جماعة.. أنا تجربتي مع الفرن
لا يمكن احتمالها..

لو قالولي فيه كلب.. كان حيبقى الوضع برضو مشابه
لموضوع الفار.. بس ما كنتش حاخذ نفسى وأروّح.. لأ.. أنا كنت
حنط من الشباك عدل..

أي حاجة تانية غير الكائنين دول أنا مكنش عندي أي
مانع أوأجهها.. أسد.. تمساح.. خريت.. تريناصور ريكس.. رُخ..
كل ده مقدور عليه..

"طالما مش فار ومش كلب.. إيه اللي في المطبخ؟؟"

سألت طبعا وأنا نافش صدرى وعامل فيها "هركليز" اما
كان واقف مستنى هيكتور يخرجله من ورا أسوار طروادة عشان
"يشندله".. كان ناقصنى عصاية مقشة وغطا حلة.. ومحدش
ساعتها كان حيفرقنى عن براد بيت..

أم العروسة فرحت بيا قوي على فكرة.. واطمنت إن بنتها
حتكون عايشة مع "ال كابونى" في البيت.. اللهم صل على
النبي..

العروسة طبعا.. للأسف.. عرفاني وخبزاني كويس.. وعارفة
تجاربي المريرة..

بصت لي.. وقالتلي..

- "اطمن.. لا فار ولا كلب... دا صرصار"..

أنا طبعا..

- "هههههههههه.. خايفين من صرصار؟؟؟.. إنتو عليكو هزار
يا جماعة.. مش موووومكن والله.. مش موووومكن.. هههههههههه..
شربات انتو والله.. "

- "طب خش مَوْتَهولنا.."

- "هههههههههه.. يا جماعة عيب الكلام ده.. حقوق من
الأنطريه.. وأروح المطبخ عشان أموت صرصار.. أنا عادة ما
بتحركش غير أما يكون فيه ديب سحلاوى محتاج حد يموته..
بصو.. أقل من تنين مش حتحرك من مكانى.. ههههههههه.. أما
انتوا عليكو حاجات.."

- "معلش.. خودنا على أد عقلنا.. احنا ستات.. وبنخاف
من الحاجات دي.. "

- "ههههه الأمر لله.. هو فين السبع؟؟?"

وقمت بقى ونهضت نهضة الدب الرابض أما بيشوف
أرنب.. وفردت صدرى وبقيت شبه الديك الرومى فوق
قفص الفراخ عند الفراجى وهو منفوش وعمال يقول
"بلولولولولوى.."

توجهت إلى المطبخ واثق الخطوة.. مفرود القامة.. وكأني
أنعى مسبقاً الصرصار المرحوم.. الذى سوف يكون مصيره
كلمة واحدة.. "سأسحقكم.."

دخلت المطبخ.. لقيت الصرصار حلو كده مبربر اللهم
صل على النبي.. شاكله واكل ومتغذي كويس.. ومرمي على

الأرض.. توجهت إليه بهدوء وثقة.. وأنا لابس الجزمة اللي
حتكون كفنه في خلال ثواني.. وبمجرد أن اقتربت منه..

هووووووووووووووووووووووو

راح طير..

شوفم.. شووووفم.. إحنا ما اتفقناش على كدة.. أنا بخاف
من الفران صحيح.. بخاف من الكلاب أي نعم.. إنما صرصار
بيطير..

بيبي كخ على روعي فوراً..

عارفين لو مش بيطير.. ولا يفرق معايا.. آخره.. حيستخبي
في الغسالة الحقيير.. إنما بيطير.. ممكن يدخل قفايا.. أضرب
نفسى بسكينة بلا تردد..

طبعا.. بمجرد إنه طار.. وقبل ما جناحه يضرب الضربة
التانية.. كنت أنا عند باب شقة العروسة بقولهم ان أنا جالي
تليفون مهم بيطالبني إني أروح في أي حطة بعيد عن المطبخ..
أي نعم التليفون ما رنش.. بس معلش.. أنا حاسس إني لازم
أمشي فوراً..

العروسة بقى.. ومامتها.. وأختها.. بصولى بصة مفادها..

"الرجالة ماتوا في الحرب صحيح.."

وأنا بصتلهم بصة مفادها.. ولا أي اندهاااااش.. ايوة.. ماتوا
في الحرب الله يرحمهم.. ابقوا دورو على واحد ما ماتش يموت
الصرصار بمدافع مضادة للطائرات.

ده صرصار بيطير مش أي كلام.. ده احتاج يترقى ست
ترقيات قبل مرحلة الطيران أساسا!!!

بعد الأخذ والرد.. والمداولات وأنا مش عاوز أسيب اوكرة
باب الشقة.. وبعد مرور ما يقرب من ربع ساعة محايلة..
أسئلة من العروسة.. وتبريرات مني لا تمت للمنطق بصلة من
قريب أو من بعيد..

قررت إني استشهد في المطبخ قصاد الصرصار.. حفاظًا على
ما تبقى لي من كرامة..

إلهي يحرقها الكرامة اللي تخلي بني آدم يقف في مواجهة
صرصار بيطير..

أساسا ده شكله من العصر "الخشبي".. شكله محتاج
حزام ناسف عشان يموت..

ده طار طيران يدل على إنه بيلعب جومباز من اتناشر
سنة..

أنا حاسس إنه ممكن ياخدني ويطير من شبك المطبخ
اللي دخل منه الله يحرقه ويطلب من أهلي فدية عشان
يسيبني!!!

- كان لازم يعني تفتحوا شبك المطبخ???

سؤال ألقيته على المشاهدين اللي فطسانين على روحهم
من الضحك وأنا بجرجر رجلي على المطبخ..

وقفت على الباب ثواني.. تذكرت كل اللحظات الجميلة
اللي عدت عليا في حياتي.. تذكرت كل أصدقائي.. حزنت إني

مش حلقق أفرح بشبابي.. قرئت الشهادة.. ودخلت المطبخ..
وقفلت عليّ الباب من جوة..

الدقائق تمر ببطء.. والصوت الصادر من المطبخ.. يدل
على إن فيه فض اعتصام جوة..
عدت نص ساعة..

وخرجت..

استقبلتني أم العروسة بسؤال وهى مفزوعة..

- "يا خبر اسود.. إيه اللي على هدومك ده؟؟؟"

- "لا يا طنط دي حلة الملوخية.."

- "وإيه يا حبيبي صوت الصويت الرهيب اللي كان في

المطبخ ده؟"

- "لا يا طنط ده الصرصار التافه كان بيحاول يستغيث

بالجيران بس أنا ما ادتلوش فرصة"

- "موته يا حبيبي؟؟?"

- "هرب الجبان من الشباك بعد ما هزمته في معركة

التحطيب"

- "طب الحمد لله.. يعني ندخل نكمل تحضير الاكل

بقى؟"

- "لا.. انتو ممكن تجيبو العيش ونقعد نفت فيه في أرضية

المطبخ أوقع.. أو في حل أنصف.. هاتو العيش وغمسو من على

البلوفر اللي أنا لابسه"

الاعتراف الرابع عشر

لما تحب تتكلم عن الفروسية.. يبقى تذكرني بكل فخر وعزة وكبرياء.. لما تحب تعرف حاجة عن ركوب الخيل.. تجيب كرسي.. وتقعّد قصادى وتسمع وتكتب اللي حقولهلوك في أجندة.. لأن ده سيكون مرجع هام جدا لفرسان المستقبل.. خصوصًا أما تعرف كويس قوي.. إني طول حياتي.. ركبت "حصان" مرة واحدة..

هي كانت كفاية إني أتعلم كويس كل حاجة عن "الاحصنة".. وإني أعرف أتعامل مع "الحوصنات" كويس قوي قوي يوم "موقعة الجمل"..

شلة الشباب الفاسد.. في مرحلة المراهقة..

شلة الشباب الفاسد.. عاوزة تخرج..

شلة الشباب الفاسد.. عاوزة تروح حتة تنطلق فيها..

شلة الشباب الفاسد.. عاوزة تقضى اليوم كله من أوله
لحد آخره...

شلة الشباب الفاسد.. قررت تروح "الهرم"

وإذا ذكر الهرم.. ذكر ركوب الخيل..

وإذا ذكر ركوب الخيل.. أسيبكم أنا وأروّح بكرامتى.. بدل
ما اليوم ييوّظ

أنا مفيش عمار بيني وبين الاحصنة.. فيه بينا مشاكل
وراثية متراكمة من زمان..

من أول مرة الحصان اخد فيها العربية الكارو اللي محلمة
خيار في السوق القديم وطلع يجري ورايا عاوز يفترسني لسبب
أو لآخر أنا معرفوش لحد النهاردة.. والعرجي يا كبد أمه
بيجري وراه بيحاول يوقفه والحصان حالف بتبن اللي جابته
انه لازم يغير من نفسه إلى "أكل لحوم" ويفترسني حتى بعد
ما طلعت فوق عربية نقل..

ومرورًا بكل المرات اللي حاولت فيها أحسن علاقتي بيهم
إلا إن رد الفعل كان هياج عصبي وكأني بحاول آخذ مكانه على
عربية العرجي واقطع أكل عيشه!! أو انى مثلا طمعان في
حدوته اللي في رجله وعاوز امشيه حافي..!!!

كانت فكرة الهرم.. رائعة.. وكان اليوم.. مالوش مثيل..
كانت الصحبة ممتازة.. والضحكة واصلة لعنان السما.. لحد ما
طلع واحد غبي..

"يالا نركب خيل"

فكرت أقولهم.. طب اركبو انتوا الاحصنة وأنا حجري
وراكم برجلي.. بس حسيت إني حيبقى شكلي بايخ قوي..
ومُهين

فكرت أقولهم أنا عندي تسلخات ومش حقدر أركب
معاكم.. بس أنا بلعب من الصبح زي النسناس والحجة حيبقى
شاكلها ماسخ برضو..

فكرت للحظة أعمل دايخ ويصيني إغماء اصطناعى
مفاجيء.. بس كان السيف قد سبق العزل.. وأنى ملاعين النزلة..
بجماميع من الاحصنة..

كل قرد من القروود الي أنا مصاحبهم.. نط معتليًا سطح
حصان من الاحصنة..

ولم يتبق على الأرض إلا شخص واحد.. وحصان واحد..
"بحبك قوي أماما.. الوداع"

طبعًا.. بيبقى معروف انه في مثل هذه المواقف.. لازم
الحظ يتخلي عنك تمامًا.. لازم كل حاجة في حياتك.. تتحول إلى
لوحة مكتملة الألوان والأركان تقعد تحاول لسنوات تفكر ازاى
اتجمعت كل المصايب دي في موقف واحد فتفشل في التبرير
لنفسك..

الحصان كان تقريبًا "حصان طروادة" حجبًا... "حصان
عنتره ابن شداد" لونا..

كان محتاج سلم عشان تطلع عليه.. ومحتاج كشاف عشان
تشوفه من كتر السواد.. ومحتاج مهدئ طبعًا لأن الصوت

نفسه كان يدل على إنه خلاص.. ناقصه دقيقة وينفجر زي
العبوات المتفجرة اليدوية الصنع..

توجهت إلى الحصان وأنا فارد جسمي.. متخذًا الطريق
الي بيسموه "المنطقة العمياء".. وهى المنطقة الي مش ممكن
الحصان يلمحني منها.. إلا لو كان عنده عين في الحشفة..
وهوووووب..

بقفزة عزالدين بيبرس.. "مش كان اسمه عزالدين باين؟!!"
اعتليت سطح الحصان.. جمب المنشر والايريال كدة.. هو أي
نعم.. عالي ومرتفع.. لكن.. أنا معنديش استعداد أخاطر إنه
يشوفني.. والرعب ده كان كفييل بإني أتحرك بناءً على أساسه..
ركبت على صوت "فهد بلان" يتردد في أذني وكأنه الصوت
الأخير في تاريخ الجنس البشري..

"وركبنا عالحوصاان.. واتيلنا سوى" ..

عارف يا حبيبي.. عارف إننا اتيلنا.. اصبر على رزقك..
الله لا يسيتك

مسكت اللجام.. وابتديت أعمل زي ما بشوف في الافلام..

- كيك.. كيك.. كيك

- يا كابتن ده حصان.. مش حمار

- نعم؟! آه..؟؟ هاهاها.. لا ما أنا عارف طبعًا.. أنا بس

بالعب معاه

- تلعب معاه؟! نهايته.. حضرتك اطلع بقى

- ما أنا طلعت خلاص.. هو الحصان ده ليه دور تانى؟؟

- يا كابتن اطلع ورا صحابك من الباب اللي هناك ده

- آآه.. هاهah

حالاً.. دلوقتى أهو

- هو حضرتك ما بتعرفش تركب خيل؟؟ الحصان ده شديد

على فكرة.

- إخرس!! ! انت بتكلم شكرى سرحان في فيلم رد قلبي

قبل ما يتكفي على الأسفلت من فوق الحصان.. بص.. قولى

بس.. بيشتغل ازاي!؟

- أنا حطلعك برة.. وهو إما يشوف باقي الخيل حيتحرك

وراهم

- الله يكرمك يا عم.. ويوقعك في ولاد الحلال.. ويكتبلك في

كل خطوة سلامة

وفعللاً.. الراجل سحب الحصان.. وأنا فوقيه.. وتحولت في

هذا المشهد إلى ليلي مراد وهى تشدو "اتمايلي واتمخطري يا

خيل" .. بس من غير كنيش

خرج الراجل من الاسطبل.. ومن أمامه.. ظهرت الصحراء

المفتوحة.. وفي الأفق.. كانوا الكلاب أصحابي منطلقين بالخيل..

وكأنهم راكبين عجل عادي.. طبعاً.. أنا قررت إني أسيب

الحصان في حاله.. وإني أكون مجرد شوال بينقله في المكان اللي

يجبه فخامته.. وإلا أكون عبء عليه تحت أي ظرف.. حتى لو

حصان ما شاء الله.. واخذ فياجرا.. قرر إنه يلف بيا
في الصحراء الغربية شوية.. وبعدين يوصل لحدود موريتانيا..
ومفيش مانع من زيارة الأخوة الأشقاء في جوهانزبرج..

أنا خلاص.. بتحول إلى "جودا أكبر" أما انضرب سهم في
كتفه.. وفي طريقي إني أدل من على الحصان زي اللجام
بالظبط.. لحد ما لقيت الحصان متجه إلى "حافة جبل"..

أي والله العظيم يا سلطان زي ما بقولك كدة..

حافة جبل..

طيب.. أنا لو قفزت بالسرعة دي.. حموت..

ولو وصل لحافة الجبل.. مش متأكد حقدر أعمل زي
"اميتاب باتشان" في فيلم "مارد" وأطير بالحصان والا لأ.. وغالبا
برضو.. حموت..

هنا كان لا بد من التدخل..

قبل الوصول إلى حافة الجبل.. بحوالي خمسة متر.. كنت
مسكت اللجام.. زي ما بشوف في فيلم الناصر صلاح الدين
الفيومي.. وبشده عشان الحصان يقف .

طبعا الشدة كانت شديدة.. مع السرعة..

الحصان.. وقف على قائمته الخلفيتين.. قبل الحافة بمترين

تقريبا..

وبدا المشهد في غروب الشمس مهيبا..

أنا راكب الحصان.. والحصان واقف.. على حافة الجبل..

وبالنسبة ليوم موقعة الجمل.. واجهت الحصان بكل
خبرتي.. بكل شجاعة..

جريت بلا وعي.. أكنى شفت أسد

#انا_اللي_علمت_احمد_مظهر_ركوب_العجل

#حبيبي_يا_عاشق_يا_برص_زى_الطير

#ماسكو_في_زورز

#عنتر_عنتر_اوعى_يجيبلك_عنتر

الاعتراف الخامس عشر

الحب.. يااه على الكلمة دي.. الحب خلاني أجري من
المعادي لحد العجوزة عشان أروح جامع المغفرة الي ورا
مسرح البالون.. أشوف فيه حبيتي الي بتاخذ هناك درس
قرآن أسبوعي.. واستناها وهي خارجة.. بس عشان أشوفها..
ألمها.. تضحكي.. فا تضحكي الدنيا كلها..
ورغم إني متأنتك على الآخر.. ولابس بنطلون كلاسيك..
وقميص وبليزر..

ورغم إننا كنا في عز الشتا.. في عز البرد.. في عز المطر
إلا إني كان لازم..

أجري بسرعة.. لإن الدرس بيخلص بعد المغرب على طول..
أجري بسرعة لإن المغرب أذن فعلاً.. أدخل جري وأصلي
المغرب جماعة..

وبعد ما أخلص.. يا سلام على الأحاسيس.. أبص ورايا..
عشان أشوفها اما تخرج..

لكنى بصيت..

ملاقيتش الجزمة..

لا مش حبييتي أقصد.. أنا قصدي ملاقيتش الجزمة بجد..

ياختا!!!!!!!!!!!!!!!!!!!!!!!!!!!!!!

طب أنا حاعمل إيه دلوقتي!!!!?

إيه الموقف الزبالة ده؟؟؟؟!

ده أنا لسة تلموذ صغير مفيش في جيبي غير 35 قرش
تمن تذكرة الميني باص اللي حروّح بيه؟؟?.. طب حمشي بيه
ازاي وسط النظرة دي؟؟؟ يا دي الليلة الكوية يا ربي..

طب حقابلها ازاي؟؟؟ لو شافنتي كدة.. يبقي ده حكم
بالإعدام على العلاقة لإنها حتأكد إني ابن بواب أكيد وأنا
حافي كدة!!! !! وطول النهار باجري حافي في الحارة.. خلاص.. أنا
مش لازم أشوفها النهاردة.. أحترم نفسي أحسن.. وأروّح

فضلت ألف جوة الجامع.. أسأل هنا.. وأسأل هناك..
أسأل المصلين.. وأسأل الإمام..

لحد ما صعبت عليه.. غاب دقائق.. ورجعلي بالحل

القباقب..

يا خبر اسود ومنيل...!!! !!

وانطلقت في رحلة العودة من العجوزة إلى المعادي.. مرتديًا
ذلك الزي الذي يجعلني فائنًا.. وراكبًا ذلك المركب الإيطالي
المسمى إفكًا بالقباق..

فكرت للحظة أخذ عصاية من الشارع واقف فوق
القباق زي سواقين المراكب في المدينة العائمة.. فينيسيا
الإيطالية.. وحيبقى مشروع يجنن في المطرة دي.. وأهو تنشيط
للسياحة..

وصف تفصيلي بقى..

مبدئيًا.. صوت القباق في كل خطوة كان كفيل إنه يصحي
الأموات.. ويموت الصاحين..

مع كل خطوة الناس كانت بتعتقد إن فيه عجلة عربية
فرقت.. فتبصلى مخضوضة... وبعدين تفهم...

تفهم إيه؟؟

تفهم إن فيه واحد مجنون من المجاذيب ماشي في الشارع
جنبها..

صوت ارتطام القباق بالأرض الممطرة في شكل برك
مائية.. كان بينطور المية على العربيات اللي ماشية.. مش
العربات هي اللي كانت بتنطور مية عليا.. عيب عليك
الشاكت مع المنطلون مع القميص مع القباق اللي
لابسه على الشراب كانوا عاملين كونتراست ابن جزمة لدرجة
إن فيه ناس شبه أغمى عليها من الضحك على منظري..

انتظرت الميني باص رقم 70 الي بيعدى ويروح المعادي..
أكثر من ساعة ونص على المحطة.. والناس بتعدى عليا..
تضحك وتمشي.. تروح تنده صحابها.. وييجو.. يضحكو ويمشو..
يجيبو أهاليهم.. يضحكو ويمشو..

كان فاضلي دقايق قليلة.. وابتدى أقطع تذاكر للمشاهدة..
وأنافس السيرك القومي واسحب منه المتفرجين

إنما الميني باص وصل الحمد لله.. حاملاً حى العجوزة
والمهندسين وامبابة بالكامل.. وما وقفش كمان في المحطة زي
عادته.. وكمل مشي ولا أكن فيه نسناس بابوني واقف على
المحطة لابس شاكت ومنطلون كلاسيك وقميص عليهم قبقاب
بُني بجلدة سودة..

ابدأ معايا في التخييل.. واحد لابس شاكت.. ومنطلون
كلاسيك.. وقبقاب.. بيجري ورا ميني باص مليون وعمال يدوس
في برك مية ويطرطش مع صوت ارتطام القبقاب بالأرض في
خطوات واسعة كقفزات الغزالة في محاولة للحفاظ على
القبقاب اللعين في متناول القدم.. ده غير إن الشراب بعيد عنكم
بقى عبارة عن سفنجة حفاضة بتمتص المية من الشارع زي
عربية شفت المياه بالظبط.. يا ريتنى كنت قبعته مع الجزمة
واتسرق هو كمان وخلصت

ربنا وفقني ولحقت الميني باص.. واتشعبت في ناس
كانت مدلدلة من الباب.. عافرت لحد ما دخلت الميني باص
أنا والقبقاب.. ومن الزحمة.. الناس هرست صوابعى.. بلا

رحمة.. ومع اقتراب الميني باص من نهاية الخط.. بدأ يفضي..
وبدأت الناس تشوف إيه اللي بيترقع ده..

السواق وقف الميني باص تسع مرات وبقى ينزل ينام
تحت الميني باص في امية عشان يشوف الصوت ده جاى من
الماتور والا من عامود العجل؟؟؟ وأنا عامل عييط..

وصلت البيت.. طلعت ودخلت الشقة.. وكنت في شبه
حالة انهيار من البرد والمطر والقباقب..

ودي كانت نهاية حكايتي مع القباقيب للأبد.. إلهي
يقطع الحب وسنينه

إيه؟؟؟ نعم؟؟؟

القباقب؟؟؟ مالو؟؟؟

لا ده ساندين بيه التلاجة لحد النهاردة.. بدل عَجَل
القاعدة اللي اتكسر

#قباقيب_قباقيب_نقول_لسة

#الحب_والعشق_وحرامية_الجزم

#السيرك_القومى_طلبنى_لاداء_فقرة_ثابتة

#انا_بصلى_بالجزمة_من_يومها

- إخرس يا حيوان.. ما تفكرنيش.. جتك الهم.. واللاادي
الريان بقول يا جاهل

- واللاادي قعدة.. مش فاهم.. ده إيه دا أبابا؟؟

- مفيش فايذة.. جاهل.. قولهم بس.. وقول للبغال
اخواتك تجهز

- حنجهز البغال أبابا.. حاضر أفنظم..

وفي صبيحة يوم الاثنين.. قفلنا التليفزيون الي كان جايب
سعاد حسنى عمالة تغني لحد أما نفسها اتكرش..

"الدنيا ربيع والجو بديع.. وأنا حاسة ان عمري بيضيع
قفل قفل قفل قفل"

"أبابا" مأنجش "اماما" ونازلين من البيت "صلانسيه" في
خطوات ملكية زي استقبال ملوك النرويج لتجار أتواب القماش
بتوع الوكالة.. واحنا وراهم.. واحد فينا شایل "الكولمان" على
قلبه.. والثاني "شایل كراسي البحر الي بتتفرد وتتنى".. وأنا
شایل "كيس الملوحة والسردين والرنجة".. وماشي بيه زي خبراء
المفرقات ما بيشيلو مادة السي فور الشديدة الانفجار..

ركبنا العربية على دقات التاسعة صباحًا.. وانطلقت بينا
العربية في أول أيام الصيفية نواحي الجيزة ومن بعدها شارع
الهرم ثم ميدان الرماية.. ومن وراه طريق الفيوم.. وعدينا..
ودخلنا بقى من قلب الفيوم للوصول إلى وادي الريان الي
"أبابا" أول مرة يروحه لأنه سمع إنه مكان جميل.. وفيه
شلالات.. ومحمية طبيعية..

طبعاً أبابا كان خايف إن يكون فيه أمن هناك لأنهم أكيد
كانو حيعملولو مشاكل وهو مرووح لأنه واخذ ثلاث حيوانات
من المحمية ومرووح بيهم.. وانه مكنش حيقدر يقنعهم إن
الحيوانات دي ولاده..

إنما.. كل ده كان سابق لأوانه بكتير.. وده لإن العربية
القديمة نفسها.. وفي تمام الساعة العاشرة والنصف صباحاً..
أعلنت لفظ أنفاسها الأخيرة.. والموت ميكانيكياً.. وتوقفت بينا
بفعل القصور الذاتي على جانب الطريق.. في وسط الطريق
الزراعي اللي على جانبه التربة اللي البلهارسيا فيها بترعى..
طريق رايح جي.. لا يقطعه إلا لوارى الستينات كل ربع
ساعة من جنب العربية هواها حيطيرنا..

الخماسي العائلي اللطيف جلس في العربية.. عشر دقائق
صمت عدت..

محدث بيتكلم.. الصدمة كانت عنيفة

نظراتنا كلها كانت كفاية بتتكلم.. وبتقول في صمت

"والمصحف حرام عليك أبابا.. مش كنت سبتنا مخمودين
أحسن"

"مالها القناطر بس أبابا؟؟ كفرت؟؟ لازم الفتى يعني يوم
الأجازة؟؟"

"ايه العمل بقى دلوقتي؟؟؟ أنا شايف نعيش في المكان ده
ونكون مجتمع عمراني حديث"

وكان رد "أبابا" على أفكارنا.. اللي واضحة في ملامحنا

- اخرس يا حيوان منك له..

- احنا ما نطقناش أبابا!!!

- بقولك اخرس بقول

- حاضر أفنظم..

- ياللا خلصوني

- ياللا ايه أحاج؟؟

- ياللا انزلو زقوا

- نزق مين أبابا؟؟؟؟؟؟؟؟؟؟

- ياللا يا حيوان منك له.. أو مال أنا مخلف بغال ليه !

- حاضر أبابا.. حاضر يا مخلفنا عشان تهينا

- بتقول إيه يا حيوان!!

- لا أبابا دا أنا بقول إني بحب الزق قوي.. من وأنا صوغن

وبالفعل.. اتسرسبنا أنا والغلابة اخواتي من العربية..
وعلى وشوشنا آثار استقبال يوم على ما يبدو أنه سوف
يذكره التاريخ كذكره ليوم إلقاء الامريكان للقنبلة النووية
على مدينة "هيروشيما" ومدينة "نجازاكي" في الحرب العالمية أو
العالمية وخمسين.. مش فاكربصراحة..

وبدأنا الزق في استسلام.. وبدأنا الغناء التشجيعي الحماسي
أنا واخواتي..

- نحن غرابا عك.. عك.. عك..

- اخرس يا حيوان.. وروح شوف الحاجة اللي في الشنطة
بسرعة

- حاطر أبابا

ويا ريته كان قالي ارمى نفسك في الترة عشان تكون
فريسة للبلهارسيا كان بقى أرحم.. رحى فتحت شنطة العربية..
وكأنى فتحت بلاعة مقفولة من أيام معركة عين جالوت.. الرنجة
نفسها كانت قربت تتخفق من ريحة الملوحة والسردين.. وكأن
الحكاية ناقصة عفن أساسا!!!!

أخذنا الكيس أنا واخواتي.. ورفعناه من شنطة العربية..
ووصلنا بيه لحد أبابا اللي قاعد على شط الترة على كرسي
البحر اللي بيتفرد ويتنى

- ايبيبيبيبيب.. ايه الريحة دي يا حيوان

- والمصحف ما ريحتي أبابا..

- خلاص.. الحاجة دي باظت.. مش حينفع ناكلها.. إرميها..

- أرميها فين بس أبابا؟؟

- شوف أي صندوق زبالة ارميها فيه

- أبابا احنا مش في الحديقة الدولية.. احنا على الترة..

صندوق زبالة إيه دلوقتى؟؟

- اتصرف انت والبغال اخواتك

- حاطر أفنظم

الاعتراف السابع عشر

في سنة الفين كنت لسة موظف يا دوب باشتغل مكملتش
تلات سنين..

كان عندنا في الشغل بروجكت كبير جدًا.. والحمد لله..
خلصناه بامتياز..

وتقديرًا لمجموعة الموظفين الجدعان.. الي من ثقافات
مختلفة..

قرر مديرنا الله يمسيه بالخير.. إنه يعزمننا على عزومة
محترمة جدًا.. في مكان جديد جدًا بالنسبة لي
المطعم الايطالى - الي في فندق الكونرد..

"حوماية" جامدة من بتاعة العيد.. المنطلون الكلاسيك اياه
- بتاع القبقاب - والشاكت الذى يجعلني أبدو فاتنا.. وجزمة
كلاسيك بقى إنما إيه !!.. الي حيقولي اقلعها بالشلوط في عينه..

توجهت إلى حيث الفندق اللي طبعاً عمري ما دخلته..
يااااه يا ولاد.. ده حاجة فخيمة جداً جداً.. ما شاء الله..
هيلمان.. إيه الأوبهة دي!!؟

تدخل.. تلاقى نور خافت.. يقابلك واحد على الباب برة
شاكله راجل محترم قوي.. تقرب منه.. يروح فاتحك الباب..
تقوم مسلم عليه.. وتقوله "ربنا يعزك".. وتفكر للحظة
تبوسه تقديرًا لمجهوده بس تتراجع في آخر لحظة عشان ما
تخرجوش..

تدخل البهو.. أووووف... إيه ده؟؟؟ إيه النجفة اللي فوق
دي.. يا أماما..

تعدي بعيد عنها وانت باصص لها فوق براسك.. أحسن
تقع عليك والا حاجة..

تقوم طاسس في واحد واقف في الضوء الخافت.. وانت
طبعاً مش شايفه من قلة النور.. شكله محترم أكثر من الراجل
الي فتحلك الباب..

- مساء الخير

- جود افتر نون سير.. هاو كان أي هيلب يو؟؟

- اممم.. ايه فور Apple.. بي فور بطة تقريباً مش فاكـر..

ثواني كده اما افتكـر!!

- أقدر اساعدك بايه حضرتك؟؟

- ايوة كدة.. النبي عريي.. حبيب قلبي.. بعد إذن جنابك..
ممکن تقولي المطعم الايطالى فين لو سمحت فخامتك؟؟

- اووووه.. زي ايتاليان ريستورا.. سكند فلور سير

- معقول؟؟؟؟ قفل؟؟؟ ليه؟؟؟ شكله ما اشتغلش كويس..
خسارة.. دا أنا كنت واخذ معاد فيه النهاردة!!! لا اله الا الله..
ياللا ملناش نصيب

- الدور التانى حضرتك!!!

- هاهاهاهاه.. ما أنا عارف بس بهراً معاك.. شربات
سعادتك

- أي خدمة تاني؟؟

- لا الله يكرمك.. كده فل قوي.. وألف ألف مبروك على
الأوتيل.. جامد قوي بصراحة

- نعم؟؟؟؟؟؟؟؟؟؟؟؟؟؟؟؟؟؟!!!!

سبت الراجل وهو مش فاهم أي حاجة ومشيت بقى
ناحية ما شاوري كدة.. وطلعت سلم لافف كبيير.. فكرت
للحظة أطلع لحد فوق وانزل زحلقة على الطرابزين الرهيب..
بس قولت بلاش عشان ما وسخس الطرابزين اللي شكله لسة
متلمع من ساعة..

طلعت الدور التاني.. لقيت باب المطعم الإيطالى.. دخلت..
لقيت الدنيا ضالمة مووت..

- يادي النيلة.. اظاهر أنا قريت على الأوتيل والكهربا
قطعت باين.. طب إيه العمل بقى دلوقتي؟
- جود افتر نون سير.. كان أي هيلب يو؟
- أنا سمعت الكلام ده فين قبل كدة..؟؟ آه من شوية..
- مساء الخير.. مش ده المطعم الايطالي..؟؟
- تمام يا فندم فيه ريزرفيشن؟؟
- لا والله معايش فكة خالص.. كل الي معايا ورق
بخمسات
- نعم؟؟؟ بقول لحضرتك فيه حجز مسبق؟؟؟!!
- ااااه.. لا بوص.. احنا جاين تبع الاستاذ عزت الشريف
- تمام سعادتك.. تابول نامبر 8
- لسة ماجاش؟؟؟ غريبة؟؟ مع إنه مأكد عليا الساعة؟؟؟
- خلاص حسستناه عند ملف الطرابزين
- يا فندم بقول لحضرتك طراييزة ثمانية
- أيوة أيوة.. ههههههه.. شربات انتو هنا في الفندق .
- بعد إذنك.. استأذنك في الموبايل
- آآآه طبعاً.. اكتب عندك.. زيرو عشرة..
- حضرتك أنا اقصد استأذنك تسبب العدة هنا لإن ممنوع
دخول الموبايل عشان الإزعاج
- العدة؟؟ بس دي لسة عليها كمبيالات!!

لطيف قوي قوي إنك تمسك منيو بالإيطالي.. في الوقت
الي أكثر أهل الطراييزة علمًا بيتكلم سوهاجي مكسر تقريبًا..
بصيت للمنيو.. أكنى بتفرج على مجلة علمية بالظبط..
وأكيد الكلام الي مكتوب فيها ده هو وصفة تحضير ثاني
أكسيد الصنوبر.. أو كربوهيدرات البيتزا

فازة قاعدة على الكرسي.. دقائق كمان وكنت حبتدى
أنهق.. أنا وكل الي قاعدين على الطرييزة..

بصينا لبعض بصة معناها.. يادي الليلة الكويية.. وهوب..
لقيت "زورو الانيق" واقف فوق راسي عشان ياخد الأوردرات..
وبصفتي أول واحد على يمين الطراييزة.. كان لازم ابدأ بالطلب..

طبعًا.. في معلومة تهتم الي بيقرأ عشان يبقى فاهم
يعني.. أنا الحمد لله.. وأعوذ بالله من كلمة أنا.. مقسوم
إلى جزئين.. جزء من لحم كتافي من خير عربية الكبدة بتاعة
عم رجب حميدة الي كانت واقفة في التحرير.. والنص الثاني..
من خير عم عبده بتاع عربية سندوتشات المكرونة بالشطة
في العيش البلدي.. الي كانت جنب شارع البروصة في وسط
البلد..

كل اهتماماتي عن الاكل هي حنطرت امتي؟؟ حنتغدى
امتى؟؟ في عشا والا لأ يا حاجة!؟

عودة بقى إلى الراجل المحترم الي واقف قدامي.. وماسك
ورقة وقلم.. أكنه حياخد مقاس البنطلون بتاعي.. عشان
يفصلي بنطلون بدل الي أنا لابسه

- يور اوردر ايف يو بليز؟!

- الله يعزك.. هى كمان بتسلم عليك قوي والله.. السلام
لمامتك انت كمان أمانة

- طلب حضرتك يا استاذ!!!!

- اممم.. احممم.. أه.. طب.. انتو عندكو إيه بتشتهرو بيه
هنا بقى عشان الواحد مختار من كتر الأصناف الفضيعة اللي
عندكم في المنيو بصراحة؟

- أنا أشرح ل حضرتك الايتاليان شوربيملتسخفلسبنليكنو

- اممممممم.. بس يا ترى بتعملوه زي برة..؟؟ والا
احسن؟؟ عشان أنا كلته في تحت كتير كويسة

- لا حضرتك.. ده المين ديش الرئيسى بتاع المطعم اللي
بنتميز بيه

- ممتاز.. طيب بتعملوه ازاي بقى؟؟!!!

- ده بنجيب حضرتك الزوفليط الإيطالي ونحشيه
مفلوضيللو بالكارى المشوي على ديول الماعز الجبلى وفي الآخر
بيبقى الدريسينج صوص الغالافيسوكينو السويت اللي ممزوج
بسوالف العرسة اللي في بوقها شمعة.

- ياااااااااه على الروعة.. ياااااه.. طيب أنا حاخذ منه
بقى عشان أجرب.. ولو عجبني.. حاخذ منه كل مرة أجيلكم
فيها.. واحتمال أبقى اطلبه دليفري كمان

- تحت أمرك يا فندم.. وان شاء الله حيعجبك طبعا

أنا شكيت للحظة إن ده برنامج الكاميرا الخفية.. ومطلوب
منى أمسك الطبق اللي شبه الإشارة وأقوم أنظم المرور في
المطعم!!

بس والمصحف طلع أكل..

بدأ الشباب في التعامل مع الاطباق على طريقة تعامل
خبراء المفترقات مع الديناميت..

الى يهز الطبق من بعيد أحسن تكون في حاجة صاحية..
واللى يلمس الأكل بالشوكة ويشيلها بسرعة أكنه اتكهرب..
واللى قاعد بيص للطبق مستني إن الطبق هو اللي ياخذ
الخطوة الأولى!!! !

العبد لله.. مسك الشوكة..

وقطعت حته من الدوارية الخضرا..

طبعا ده ضفدع مهروس تحت عجل أوتوبيس... اووع..
بلاها الزفت الأخضر ده خالص..

قطعت حته من الدوارية البورتقاني..

إننا لله وإننا إليه راجعون.. الطمطماية اللي كان شايلها
الضفدع اللي اتهرس وهو بيعدى الشارع اتهرست معاه..
اوووع... بلاها الزفت البرتقاني ده كمان..

آآآآآ آخر أمل... كان من اللي في النص..

الدوارية البيضة..

تصدقوا كان طعمه كويس.. أو هكذا قرر عقلي الباطن
لإني ما عايش قصادي اختيارات..

المهم ان الكل أكل.. أو هكذا شُبّه لهم.. وشكرنا مديرنا..
مع وعد "داخلي" بالانتقام حين تسنح الفرصة.. خرجنا أنا
وعبدالحميد الغلبان زي المجانين عشان نروح نشوف حته
نتزفت نتعشى فيها .

وحنا ماشيين.. سألت عبدالحميد..

- انت إيه الطبق اللي كنت بتاكله ده يا عوبد؟؟؟

- ده كان دبس الرمان مع كمبيالات المصرف البيتزاوى..
بس طعمه كان قبر كلب.. وانت..؟؟؟ ايه البتاع الأبيض اللي
كنت بتاكله ده؟؟؟

- ما تفكرنيش يا عبدالحميد.. ده تقريبا كان كفن الضفدع
الله يرحمه

#سى_سنيورى_ما_تطفح_بيتزا_وبلاش_فتى

#المطعم_الايطالى_فى_شارع_عماد_الدين

#عاوز_ادوق_البورشيح_المتشوح_على_فخاد_النمل

#احبيبي_اعم_عبد

الاعتراف الثامن عشر

كل ما كلمة الحب بتيجي على بال الواحد.. بتعدي عليه
صور جميلة.. ورد.. وشمس.. وهو.. وقلوب حمرا طيارة في
الفضاء.. وحاجات كده بتخليه بيتسم..

انا كده برضه.. كل ما كلمة الحب بتيجي على بالي..
بتجيلي حالة من الابتسام اللا إرادي.. زي التبول اللا إرادي
بالظبط.. وبتبدأ صور جميلة تعدي على عقلي..

قبقاب خشب.. مطرة.. ميني باصات مش عايضة تقف
إلهي يهد اللي سايقها.. جزم مسروقة.. حاجات كدة.. بتخليني
أقعد وابستم وأقول في قرارة نفسي

"يااااه.. أنا اتمرمت كثير قوي عشانها والله" ..

أول عيد حب عدى علينا.. ماكنش لسة فيه احتفالات
فلانطايين والحاجات دي زي اليومين دول.. كانت لسة الأمور

هادية.. ويقولك بكرة عيد الحب وبتاع.. اللي يطنش يطنش..
واللى يحتفل يحتفل..

وبما إني رومانسي مووووت - في البدايات طبعا - كنت لازم استغل اليوم ده.. واعملها مفاجأة زي اللي كنت بشوفها في الأفلام الأجنبي.. بس للأسف.. المفاجأة كانت فعلاً شبه اللي في الأفلام الأجنبي.. أفلام الزومبي.. مش الرومانتيك.

قعدت اسألها في التليفون أبو سلك.. لإن وقتها لا كان في موبايلات ولا قرد.. رايحة فين؟؟؟ حتعملى إيه؟؟؟ وهي غلبانة مش عارفة طبعا الشيرير اللي هو أنا بسأل ليه؟؟؟ وليه الإلحاح ده في إني أعرف خط سيرها بالظبط.. وكانت حجتني إني باطمئن عليها

طبعا.. أنا كنت بطقسس عشان اعمل فيها "ريتشارد جير قلب الأسد".. واجيب "باكو" ورد.. وأفاجئها بيه في وسط الشارع.. واعملها الحركات بتاعة الأجنب دي..

طبعا الفلانطيين.. في فبراير.. لازم تعرف إن وقتها.. كنت لسة طالب.. لا كان في عريية ولا كان اختراع الموبايل ظهر.. وكان الشتا زمان شتا.. مش زي اليومين دول.. تمطر يوم وتانى يوم تبقى درجة الحرارة أربعين وكل سنة وانت طيب..

عقدت العزم.. ونزلت.. وكان أول مشوار رايحاه مع صحباتها بتوع الكلية.. وحيروحو الملحق التجارى بتاع هيلتون رمسيس.. رحت.. وأنا متخفى زي مخبرين قسم الدرب الاحمر.. ووقفت على جنب ورا عمود.. مكنتش محتاج أكثر منه لإني كنت أرفع منه بكتير..

خرجت من المول وأنا مش قادر أخذ نفسي.. ورافع
بوكيه الورد أحسن يتهدل.. أبص يمين.. أبص شمال.. مش
لاقيها.. اهى.. اهى..

لمحتها راكبة تاكسي مع صاحبها.. وطالعة بيه من قصاد
المول..

يا ختاللى حتشوووووووفني..

المفاجأة حتبوظ يا ختاللى..

اجرى زي فاروق الفيشاوى في فيلم المشبوه أما كان بيجرى
ورا عادل امام..

واستخبي ورا عربية.. وبعدين..

"في حاجة يا أستاذ؟؟؟؟"

صاحب العربية واقف مش عارف يفتح الباب لاني ساند
عليه وببص من الإزاز عشان أتابع التاكسي رايح فين!! !
"لا أبدا.. دا أنا بس كنت بتفرج على العربية.. حلوة قوى
على فكرة.. هاهاها"

عربية رينو حمرا موديل سنة 1914.. اتفرج على إيه
بس!! ! شكلي زبالة

المهم.. أنا طبعا بذكائي المخبراتي وحسي الأمني وخبرتي
الطويلة في شغل المباحث كنت عارف منها بعد كده حتروح
فين.. على سبيل إني لازم أعرف كل تحركاتها عشان ابقى "مطمئن
عليها".. يا واد يا شريف يا جامد..

- تاكس.. تاكس.. الزمالك يا اسطى

- فين في الزمالك يا بشمهندز!!

- الحمامة سنتر.. بس بسرعة

- فين؟؟؟؟!!!!

- معلش قصدى اليمامة سنتر.. بس حمامة الله يخليك

انطلق التاكس.. وأنا بحاول اهندم البوكيه الفظيخ اللي
واخده.. وأوضب فيه.. الللله الورد ريحته فطيعة.. بيص من
الازاز.. لقيت الدنيا بتندع..

مش مهم.. عادى.. هى بتندع وبعد كده حتسكت ان
شاء الله

ثوانى.. ولقيت الندعة زادت.. عادى دي سحابة وحتروح
لحالها في دقيقة

لحظات.. الندعة قلبت مطرة.. يااااه.. خير خير ان شاء
الله.. المطرة خير.. ولسة يا دوب حادعي

المطرة ابتدت ترخ.. ومع الرخ.. سمعت شوية صوت
رعد.. وشفت برق..

اللهم اجعله خير يا رب دي معملتش كده من كذا سنة!

بس دا اكيد حيبقى يوم تحفة.. وحتبقى ذكريات جميلة..

يااااه

- اليمامة سنتر يا أستاذ

- مالها؟

- يا أستاذ وصلنا اليمامة سنتر!!!

- آه.. أيوة.. ممكن بس تنزلني على الرصيف عشان مش

لابس المايوه

مسافة ما حطيت رجلى في الشارع.. حسيت إن السحب
كانت كل ده لسة بتهزر.. وأول ما شافتني نازل من التاكس..
هاتك يا رخ على حق بقى..

طبعا مش مهم أنا.. المهم البوكيه.. الورد.. شقى عمري..

حيكون شكلي رهيب على فكرة.. غرقان مطر.. وبنقط
مية.. وأنا داخل عليها وبديها البوكيه.. يا خبر ابيض على
الرومانسية.. شروخان في فيلم مين الي ما يحبش بطة.. حبقى
رهيب..

دخلت اليمامة سنتر.. على حارس الأمن

- لو سمحت.. ماشوفتش أنسة مع ثلاث أنسات من

شوية لسة داخلين

- افندم؟؟؟؟!!

- بص هي لابسة فستان ازرق ومعاها شنطة بيج كدة

- لا يا استاذ ما شوفتش!!

طبعا الراجل بصلي وأنا غرقان مية.. وشايل بوكيه الورد

الي محاطه عشان ما يتبلش فواخده في حضني.. وحسيت

انه عاوز يخبطني بحاجة.. سيبتته ودخلت أعتمد على نفسي..
أدور يمين.. مفيش.. أدور شمال.. مفيش..

يمكن لسة ما وصلتش؟؟!!

بس هي أكدت عليّ انها حتيجي هنا الأول مع صحباتها

طب اعمل ايه؟؟؟ أية.. أنا أقعد استناها..

بس ممكن تدخل تلاقيني في وشها.. المفجأة تبوظ!!!

اممممم.. أنا حاخرج برة.. واستنى قصاد المول الناحية
التانية.. لحد ما ألقاها وصلت.. ونازلة من التاكس.. وهوب..
أروح داخل عليها باغنية

"طلعت فوق السطوح هز الهوا كُمي.. خليك حنين بقى
وارحم عذاب أمي"

فكرة رائعة.. نزلت بسرعة.. وأنا مترقب أحسن تيجي
والا حاجة.. شايل بوكيه الورد.. وورايا بركة مية عمالة تنقط
من هدومي اللي بقت "نوغة".. وخرجت من المول.. وجريت
ساروخ عديت الشارع في المطر الناحية التانية..

زي فريد شوقي أما كان بيجرى ورا زي روستم في فيلم
رصيف نمرة تسعة

طبّعًا.. وضع البطة.. ورا العريية.. ببص من الإزاز على
باب المول.. أهو.. تاكس.. أية بقى.. إيه ده؟؟؟ لا مش هي..
أهي أهى.. تاكس تاني.. أكيد هي بقى.. لا برضك مش
هي..

حتبقى خاتمة قرآن لو التعب زاد كدة.. مش حيلحقوني..

متخيل منظري.. وأنا داخل عليها روستري.. وتعبان..
ومبلول.. ومعايا الورد زي بئعي الزهور في سيريا وهما بيموتو
من البرد.. وهى بقى.. ياااه يا كوكو.. كوكو مين؟؟.. إنت
كوكو.. وتروح واخداني مشفقة عليًا.. تجييلي حاجة سخنة..
اشربها.. وأروح ساقط من طولى..

حتبقى ذكرى رومانسية بنت جزمة..

- سور نادى الصيد يا أستاذ

- اشمعنى!!!

- يا بيه وصلنا.. انت حتخشلي قافية؟

- آآآه.. أيوة.. يديك الصحة.. معلش.. شووكرن

نزلت مترنج.. حاولت أكون مترقب بس المطر كان نازل
على الهدوم المبلولة أساسًا عملني ممسحة.. البوكيه مجرجه
ورايا في الأرض خلاص.. دخلت على روستري.. ابتسامة الموت..
أدور في الطريزات..
طبعا.. مفيش..

يمين.. شمال.. هو يوم شمال من أوله..

أخذت لفة وسط نظرات الناس في الكافيه.. وخرجت
مجرجر البوكيه وخيبة الأمل اللي راكبة جمل..
يا ترى بحسي الأمني والمخابراتي والمباحثي أعمل إيه
دلوقتي...؟؟؟

- لا أبدا.. على ذكر الموت.. حروح أغير هدومي وأبس
كفن.. بس يكون ناشف

#يهدها_لذكريات

#هو_الفلانطين_ده_مش_لينا_اصلا

#حسى_المخبراتي_المباحثي_الامنى

#اتوكس

#يا_تعيش_وانت_ناشف_يا_موت_وانت_ساقع

الاعتراف التاسع عشر

"انت لازم تعتمد على نفسك يا شريف.. يا شريبييف"

كلمات أبا الله يرحمه عمالة تتردد في وداني وأنا داخل على "كانتشين" المدرسة في الفسحة.. في مدرسة الثانوية العسكرية اللي في المعادي..

طبعا الكلمات دي كانت بتتردد لإن نسبة الفاقد في العيال اللي بتروح "الكانتشين".. أكثر بكثير من نسبة فاقد أفراد الصاعقة في الحرب.. منظر شبك "الكانتشين" اللي عرضه متر ونص.. وارتفاعه متر.. ومقفول بالقضبان الحديد زي الزنزانة عمره ما راح من بالي أبداً..

مش بس كدة.. المنظر اللي كان الأبعش دوماً.. هو منظر أكثر من ثلاثلاف طالب.. ييهجموا عليه وقت الفسحة عشان ياخدوا منه "السانجوتش" الوحيد اللي كان ببيعه..

"سانجوتش الطعمية".. ألد.. ألد

في عيال كانت بتتوضي.. وتصلى ركعتين صلاة غائب..
وبعدين تاخذ نفس عميبييق.. وتدخل.. أو للتصحيح.. بيبقى
نفس أخيببيير وتدخل..

المدرسة الثانوية العسكرية هي اللي تخرج منها الراجل
"الى بنى مصر".. قديمة قدم الدهر.. أعتقد إن سكان الكهوف
اتعلموا على "صبايرها" كيفية رسم الغزلان ورحلات الصيد
اللي رجعوا بعد كده رسموها على جدران الكهوف وقت
الامتحانات..

ورجوعاً إلى أقصى مكان في الكوكب.. شوباك الكانتشين..
كان وقت الفسحة عشر دقائق بالطبط.. وكان الوقت
اللي بيحتاجه الطالب "السريع" عشان يوصل من الفصل إلى
الشوباك.. حوالى ربع ساعة..

المسألة كانت تعجيزية تمامًا.. ومع الجوع والرغبة العارمة
في الأكل.. وجري المدرسين بالكرابيج والسيوف ورا العيال اللي
لسة ما طلعتش الفصل بعد الفسحة اللي لسة أساسًا ما
ابتدتش.. كان الوضع دائماً أشبه بحفلة "هرس" جماعية..

للأسف.. المرة دي.. كان الدور عليًا إني آخذ الفلوس من
العيال صحابي.. وأدخل الشوباك.. ما هو كل واحد له يوم..
بالدور يعني.. هو أصلًا كان دور عصام اللي توفي متأثرًا بجروحه
من محاولة أول أول امبارح.. وأنا أخذت مكانه النهاردة..

طبعاً أنا سبتني منه خالص.. خصوصاً بعد ما ابتدت
جموع الجائعين تدوس عليه عشان توصل للشباك... و ابتدى
هو يا عيني يغوص تحت الأقدام كما غاص فريد شوقى في
بحر الرمال المتحركة لما كان عامل فيها عنتر.. يا ريتو كان
يوريني نفسه هنا..

مسكت في قضبان السجن.. قصدي قضبان الكانتشين..
ومديت إيدي بالفلوس..

- لو سمحت.. لو سمحت.. ستة طعمية.. لو سمحت..
لو سمحت

الراجل يا عيني بتاع الكانتشين.. كان بياخد الفلوس من
بعيد.. ويحدف الساندوتشات في كيس نايلو من بعيد.. زي
بالظبط حارس السيد قشطة أما بيحدف حزمة البرسيم في بق
السيد قشطة..

ولما استفسرت منه بعد سنين إيه السبب في كدة.. أكد
لي إنه في مرة طالوه من ورا القضبان.. وكانوا حيفتكوا بيه من
غير سبب - زومبيز كُفار -

الراجل حدفلي ثلاث أكياس نايلو فيهم ست انصاص
طعمية.. وجاء موعد الخروج..

طبعاً.. لطيف قوي إنك تحاول الخروج في مواجهة شعب
كامل بيحاول الدخول.. نفس نظرية محاولة الخروج من جوة
عربية المترو كده في مواجهة الناس اللي داخله..

أنا دلوقتي بس عرفت وفهمت الواد كان بيعيط ليه!!

الاعتراف العشرون

أنا واحد من الشباب قضيت فترة كبيرة من عمري كله
اتمّرَن كرة مية.. كاتش يمين.. كاتش شمال.. أربعين طول يا
ابني.. المية متلجة يا كوتش.. عوم ياض لخليهم تمانين.. حاطر
أكابتن.. وكدة يعني..

مش قادر أنسى يوم ماتش "نادي سكر الحوامدية" أول
ماتش ليا مع الفريق

العيال عندي في الفريق كلها كانت طول بعرض شبه
فرس النهر.. طول عمرهم بيلعبو اللعبة دي..

إمّا أنا بقى.. إوعى..

سلك كهربا مرمي على وش المية.. أنا محتاج عوامات "بن
تن" في درعاتي أساسا عشان أطفو

يوم الجمعة.. كان يوم الماتش الصبح.. الأوتوبيس أخذنا
وطلع وبعد ساعتين وقف في حطة مهجورة فا قولت في عقل
بالي.. يا ترى مين اللي اتزنق وحينزل يعمل "نامبر وان" هنا
!???

لقيت المدرب بيقولنا

- ياللا يا جماعة حنزل

- إيه يا كابتن حنزل الاوتوبيس؟ هو عطل؟

- لا يا لمض.. وصلنا

- وصلنا؟؟؟ وصلنا فين يا كوتش!!!!!!

- وصلنا النادي يا خفيف.. انزل يا خويا انزل

بصيت كويس ودققت.. لقيت سور سلك محاط أرض
فضاء ومكتوب عليها

"مرحبا بكم في نادي سكر الحوامدية"

يادى الحظ الاسود.. شكله يوم مش فايت من أوله

الفرقة نزلت من الأوتوبيس.. "اتسرسبت" واحد ورا الثاني
من وسط السور.. زي المطايرد اللي هربانة من سجن القناطر
بالظبط...!!!

ومشينا كلنا.. العيال اللي شبه فرس النهر في القوة
والبنيان.. بقت شبه فار الغيط وهو لسة خارج من التربة..
كان في سؤال مهم في راسي.. فين أم حمام السباحة اللي
حنلعب فيه الماتش وسط الزراعات دي كلها؟؟!!!

وكان القدر اختار أن تكون الاجابة أسرع من السؤال.

حفرة بلاط.. مستطيلة الأبعاد.. فيها ما لا يقل عن ضعف
عدد سكان الصين.. أنا أي نعم مش شايف المية من كتر
الناس..

بس باينة.. آآه يا عفاريت.. مخبيين المية فين؟!!!

أكيد اللي رجله فوق وراسه تحت ده أكيد في المية..

أكيد اللي يرمى ابنه لفوق ويسيبه ينزل على ملا وشه
ده.. أكيد بيسييه ينزل في المية

الولية اللي عاملة بلونة بالجلبية دي.. شوووور البلونة دي
مكانها في المية..

طبغًا مسؤولين النادي.. قعدوا ساعة ونص بيحاولوا يقنعوا
أهل المكان إنهم يخرجوا من حمام السباحة عشان فيه ماتش..
ساعة وينزلوا تاني.. وسط اعتراضات رهيبة من الأهالي.. لان ده
يوم الجمعة وأجازة الجميع..

المهم.. خرجوا الحمد لله.. ويا ريتهم ماخرجوا لا إله إلا
الله

للأسف لما خرجوا.. شفت المية بعيني.. اكتشفت طبغًا
إنه حمام.. بس مش سباحة.. خالص.. لا لا لا لا.. ده حمام
عمومي..

لون المية كان بالظبط بالظبط شبه لون مية المسيح بعد
ما بتمسح بيها الشارع كله!!

- الله يحرقك انت أساسًا متعلمتش الكلام شكلك.. منعول
أبوك لأبو المايو في ساعة واحدة.. خودو

ثم فررت "بجلدى" والمايوه التانى اللي دايمًا بنكون
لابسينه احتياطي تحت الأولاني.

#انا_كوندة_كندى

#سكر_انتو_هنا_في_الحوامدية

#ممم

#راح_المايوه_الاسبيدو_يا_حوش

الاعتراف الحادي والعشرون

كانت تيتا الله يرحمها.. ودي غير "نينا" خالص.. دي
الناحية الثانية فرع أماما.. حنينة قوي
كان بيت تيتا هو الفسحة والخروج الحقيقي..
تيتا كانت عندها بيت في المعادي.. وارثاه عن أبوها.. وكان
بيت العيلة.. وكانت تيتا آخر العايشين... كنا بنزوح ليها مع
أماما الله يديها الصحة.. نقابل خلاتي وخلاني كل يوم خميس
ونبات للجمعة..

ونصحى الصبح بدري.. نطلع السطوح.. وده ما كانش
سطوح عادي بالنسبة لينا خالص..

ده كان السطوح اللي كانت تيتا مربية فيه كل حاجة
مممكن تترتي.. بط ووز وفراخ وأرانب وحمام وخرفان وديوك
رومي..

كانت متعة حياتي إني أتفرج على المخلوقات دي وأنا
عندي لسة تمان سنين.. كنت بكون في منتهى السعادة
كنت بحب بالفطرة كل المخلوقات الحية.. كان فيه عَمَار
دائمًا ما بيني وما بينها..

إلا الديك الرومي.. وزِي ما قریتوا قبل كده الحصان
والكلاب.. أنا أصلًا الحيوانات ما بتحبنيش بس أنا اللي بقاوح..
المهم..

الديك الرومي مش عارف ليه بصراحة.. عمري ما
استلطفته..

كنت بحس دايماً إنه شكله غبي على الصبح كده أما
باصحى واطلعله.. أقرع.. رقبة حمراء.. مدلدل من مناخيره
زوائد لحمية تحسها مش مفهومة... كنت أسأل نفسي..

"يا ترى دي حد شده منها والا كان شعر وهو ضفره
ونشف عليه والا إيه حكايته!؟!"

وفوق ده كله.. كان كمان ييمشي بتناحة.. وينفش ريشه..
وعامل فيها ابن خالة الأسد بس مستخبي عندنا على السطح
عشان عليه حكم والحكومة بتدور عليه!! !

وسبحان الله.. كان دايماً الشعور ما بينا متبادل.. هو
كمان ما كانش يطيق يشوف سَخْنْتِي..

لله في لله.. كنت دايماً مسبيله مشاكل نفسية..

طبعا أنا كنت معتقد إن وسامتي وحلاوتي وجمالي
بالمقارنة بيه كان ليهم عامل في الموضوع ده بكل تأكيد..

الاعتراف الثاني والعشرون

جدو بقى الله يرحمه.. مش بتاع الأهلي!! .. لا بتاع أماما
ربنا يديها الصحة..

كان عاملنا مشاكل جامدة بصراحة..

كان دايماً عصبي وبيزعق.. وبيشخط وينطر.. كان البيت
كله بيخاف منه.. كان أسد

إلا أما نيحي أنا واخواتي.. تنقلب الدنيا ضحك ولعب
وتبقى تيتا الله يرحمها مش عاوزانا نمشي عشان يفضل مزاجه
تمام طول الوقت.. أحبيبي أجدو

احنا بقى.. كنا بنحب جدو جداً لأنه كان مدلّعنا..

بس كان فيه دايماً موضوع منكند عليا أنا واخواتي..

صحة جدو للأسف..

لا يا حبيبي.. ما تقلقش.. مش حتقلب دراما.. جدو
كان زي القرد البابوني.. كان عنده القدرة إنه ينكد على قرية
إفريقية كاملة..

بس كانت عنده مشكلة جامدة في الظهر وال فقرات..
كانت مخلياه دايما مستحيل يقدر يوطي..

كان شبه العمدة الآلى في المشية.. اللي كان بيجي في رمضان..
فوزاير جدو عبده..

وكنا نفضل أنا واخواتي نغيظه ونغنيه الأغنية بتاعة

"العمدة الآلى.. تم ترم.. شرفنا يا خالب.. تم ترم" .. أما
الراجل كان حينتحر مننا..

جدو كان سابق عصر الآلين الفضائين بعقود من الزمن..
سفن الفضاء واليوفو والحاجات المَحْمُحي دي ليست إلا مجرد
"ديكور" لشخصية جدو وطريقة تحركه..

أكاد أجزم أن "ستيفن سيلبيرج" جاء إلى مصر خصيصًا..
متنكرًا في صورة "بياع لبن بالقسط" عشان يتابع تحركات جدو
عن كثب ويرجع أمريكا تاني يعمل فيلم E.T. ويعدي من
الفقر..

طبعا الحكاية دي كانت مسببة أزمة لكل اللي في البيت..
وأعتقد أنها كانت السبب الرئيسي لانقلاب مزاج جدو طول
الوقت.. أصلها حاجة طبيعية يعني.. تخيل إن طول الوقت

- هاتولي الكوباية اللي جنبني دي

- ما هي جنب إيدك أهي.. !!

الاعتراف الثالث والعشرون

كانت أجازة الصيف هي الموعد الرسمي للعب الكورة ليل ونهار وأنا في إعدادي.. مكانش فيه حاجة بتفصلنا عن الشارع إلا نداء الطبيعة.. ونداء الجوع

كورة كورة كورة.. أما رُكبتنا بقت شبه وش أحمد السقا في فيلم إبراهيم الأبيض.. دماء بلا رحمة.. أذكر إني كان عندي "جرح" استمر معايا سنة وست شهور مش عاوز يخف لأنه كل ما يعمل قشرة أقع عليه.. وكل ده بسبب الكورة..

كنا دايماً بنحب نلعب كورة في طرقة أحد العمارات الواسعة.. اللي آخرها بيطل على منور عمارة ملاصقة..

كانت أحلى لحظاتنا واحنا بنلعب كورة.. بس طبعًا.. دايماً عشان أعرف أكتبلكم الاعترافات السوداء دي.. كان بيبقى فيه مشكلة مفرعة..

كنا نخرّج واحد مننا عشان يقف ناضورجي.. والثاني اللي عليه الدور ينط في المنور يجيب الكورة.. وبعدين يتسلق نص السور.. والشباب يقوموا بدورهم في سحبه للنص الباقي لأنه كان عالي

- يا جماعة ما بلاش أنا!!

- ليه يا شريف؟؟؟؟ ده دورك..

- لا ما أنا عارف.. بس ركبي واجعاني..

- معلش.. بس ده دورك..

- آه ما أنا عارف.. بس دراعي واجعني بالجامد

- طب نعمل إيه يا عم.. ده دورك..

- ايوة أنا ما اعترضتش.. بس اصلى عندى كحة..

- يا عم بطل تهريج ده دورك

- والمصحف ما بهرج.. معلش اعفوني.. ابن خالتي واحشني

ومش قادر..

وتفضل المناقشة تدور بالشكل ده.. لإني مرعوب أقولهم إني

بخاف من الكلاب..

يجري واحد منهم يقف على أول الشارع من ناحية

مدخل المنور الخلفي.. اللي الكلب بيدخل منه..

يشيلوني صحابي ويرفعوني على الأعناق.. زي ما تم رفع

سليمان الحلبي على الخازوق...!!! وشبه يحدفوني في المنور..

#احذف_الكورة

#في_المشمش

#كل_واحد_يخلى_باله_من_لابالييه

#الابالييووووووووووووو

الاعتراف الرابع والعشرون

كان ليا أصدقاء طول عمري بعزهم جدًّا.. اترينا سوا
وكانوا دايًّا هما اللي بنقضي معاهم المصيف كل سنة.. كانو
تلات اخوات بنات ربنا يمسهم بالخير بقى..

فى سنة من السنين.. وفى غير أيام المصيف فى عز الصيف
وأغسطس.. عزمونا أنا واخواتى على عيد ميلاد واحدة فيهم..
كانوا طيبين قوي هما وأهلهم.. وكنا حقيقي بنعزهم جدًّا
جدًّا..

الموضوع كان عادى جدًّا يعنى..

ألو.. احنا عازمينكم.. عازميننا على إيه؟؟ عيد ميلاد نرمن..
كل سنة وانتم طيبين.. طب احنا حنستناكم يوم الخميس
الساعة سبعة.. إن شاء الله جاين..

بس كدة..

لا مش بس كدة.. هو أنا مقولتلاكش؟؟؟ يقطعني!!
طب معلش العنوان فين بالظبط عشان طبعاً مجيناش
قبل كدة..

امبابة - شارع الوحدة

طيب.. أوك.. سلام سلام..

اشترينا هدية "دبدوب" وغلفناه بجلاد الهدايا وخطيناه في
شنطة هدايا

- نروح ازاي أماما.. - الله يسامحك يا أماما

اركبوا أوتوبيس 911 الي بيروح امبابة من المطبعة.. مرة
واحدة

من المعادي لامبابة عدل؟؟ اممم.. شاكلك فاهمة أماما

أيوة يا حبيبي.. "هما قالولي كدة"

وبدأت الرحلة..

الخميس 3:00 PM

وصولاً إلى محطة المطبعة أنا واخواتي.. كانت أول مرة
أعرف ليه رقم الأوتوبيس 911.. ده لأنه ما بيخرجش من
المحطة غير أما يكون محمل ب 911 مواطن كضربة بداية..
بعد الهرس والبرم والمرمطة وصلنا إلى جوار الكومسري..

- بيروح امبابة ده لو سمحت

- أيوة يا ابني ساعات

الاتوبيس تفوق على نفسه.. والسواق كان يفكر يقوم
بغير نمرة إلى 8911 بعد اضافة 8 الاف راكب منذ انطلاقه حتى
الآن إلى متن السفينة..

الخميس 5:00 PM

إيه الي يخلي الأتوبيس يدخل شارع المنيل؟؟؟

ده كان سؤال يطرح نفسه بشدة وخصوصا مع بدأ انهيار
بعض الركاب نتيجة وصول درجة الحرارة إلى درجة الانصهار..
كان في "لانا بركانية" واضحة في أرضية الأتوبيس.. أو ببسبى مية
بقى.. أنا فقدت القدرة على تمييز الروائح من الحر والهرس
وكرر الفسفسفسسى.

الأسئلة دي كلها اختفت أما لقيت إن فيه ناس بتلم
خيامها من على المحطة بسرعة.. وبتحاول ركوب الأتوبيس
دليل على إنهم مستنينه من طلعة رجب الي فات تقريبًا..

الخميس 5:30 PM

"باربيكيو تايم"

بدأت فعاليات مهرجان رقصة "هوبا حنولع ستايل" في
أرجاء الأتوبيس.. الناس ابنتدت ترفص من الزحمة.. وكل واحد
يضرب الي في ظهره كوع يبلعه لسانه.. وذلك تزامنًا مع
وصول الأتوبيس إلى سور كلية الطب في آخر شارع المنيل..
المنيل على عينه.

الركاب يتوافدون على الباب الخلفى الي الكومسرى
حالف يقفله عشان يقتل كل الناس الي عليه لأنهم مش

"جوة الأوتوبيس".. وده كان مبني على أساس جملمته المشهورة
اللي أذهلت الفارابي في قبره

"قدام فاضي يا حضرات"

أشوف فيك سنة.. مش يوم يا بعيد

الخميس 6:00 PM

تلاحم المواطنين في الأوتوبيس خلق نوع جديد من أشكال
الحياة على الكوكب.. ابتديت أشوف لأول مرة جسم برأسين..
وبنى آدم طالعه كيس نيلون من قفاه.. كان لطيف جدًا إني
أشوف راجل عجوز برجلين عيل.. إيه ده؟؟!!! دا دايس عليه
باين.. يا ضنايا يا ابني.. ما علينا..

احنا دلوقتى واخدين اتجاهنا بعد كوبرى الجامعة..
رجوعًا إلى الجيزة..

حتقولى : يا عم امبابة الناحية الثانية...!!!!!!

حقولك : مش الأوتوبيس فاضي ولازم نعدى على الجيزة
نحمل؟؟؟؟

الخميس 6:30 PM

ميدان الجيزة.. مكانش لسة الدائري اتبنى.. سرعة سير
الأوتوبيس.. متر في القرن.. الميدان كله كان مستنى الأوتوبيس
تقريبًا.. عدد سكان الأوتوبيس تجاوز عدد سكان جيبوتي
بحوالى سبعة مليار نسمة.. فيه أخ من اخواتى راح منى خلاص
وما بقتش شايفه ولا سامع صوت سريخه اللي كان مستمر

لساعات كنوع من أنواع المقاومة.. سلم أمره لله وانسال بين جموع الحجاج.. لحد ما وصل إلى رمي الجمرات حيث يجلس السواق الشيطان..

الخميس 7:00 PM

الجامعة.. طلاب كلية التجارة والحقوق والآداب والجامعة المفتوحة والجامعة المقفولة والجامعة المواربة في انتظار الأوتوبيس.. ماهو لسة "فاضي قدام يا حضرات".. أخويا الثاني بيحاول يوصل للكمسري عشان يفتك بيه.. إنما جموع الصاعدين بتدهسه في الطريق بلا رحمة..

الخميس 7:30 PM

شارع السودان من بين السرايات.. من عند حدود الكنغو كدة.. باقي سكان المجرة اللي لسة مركبوش الأوتوبيس.. موجودين في الشارع ده في الوقت ده.. الشارع ده ملوش أول.. وملوش آخر..

الناس في الأوتوبيس ابتدت تخش في "غيبوبة سكر" من العرق والحر والتعب.. وما زال هناك بشر بتجري ورا الاوتوبيس مصممة على الركوب أكنها بتجري ورا أكل عيشها.. لآخر لقمة.

الخميس 8:30 PM

الحدود الشرقية لمطار امبابة الدولي.. اللي بينزل عندها كل سكان الكواكب الأخرى اللي راكبين الأوتوبيس استعداداً لركوب سفن الفضاء القابعة في المطار والانطلاق إلى محطات الزهرة وعطارد وأورانوس.. بدأ الأوتوبيس يفضى شوية.. وما

بقاش فيه ناس تحت الكراسي.. الي تحت الكراسي دي جثث
قديمة.. مش تبعننا.. وبرضو مفيش ناس على الاكصدمات..
دي أشلاء ناس دهسها الأوتوبيس.. كان فيه بس ناس قاعدين
فوق الناس الي قاعدين على الكراسي.. يعني نقدر نقول بتاع
مليون أو اتنين على أقصى تقدير..

الخميس 9:30 PM

الوصول إلى خط النهاية.. شارع الوحدة.. ننزل بقى..
الآخر يا جماعة.. يا ريس خلاص كده دا الآخر!!! الناس ما
بتتحركش.. يا جدعان.. عودة إلى البرم مرة أخرى.. والفرك
أيضًا.. والنزول زحفًا من على سلام الأوتوبيس الخلفية.. لأن
الوصول إلى المقدمة يعتبر دربًا من دروب الخيال.. الوصول إلى
الحجر الأسود في الحج أسهل كثير..

الخميس 10:00 PM

واقفين احنا الثلاثة بنحدف الأوتوبيس والسكان الأصليين
ليه بالطوب والدمش.. وفي إيدينا شنطة الهدايا الي جواها لفة
الهدايا الي جواها الدبodob الي اتحول لعصير دباديب من
الهرس.. وبقي شبه القماشة الي بتشدها من بق كلب..

الخميس 10:30 PM

- مالكم؟؟ هدمكو مقطعة كده ليه؟؟ انتو اتخانقتوا في
الشارع؟؟؟

- لا لا خالص.. كل سنة وانتو طيبين.. احنا حنتخانق لسة
في البيت أما نروح.. أشوفها بس أماما.. أشوفها..

#_ولا_تقل_لهما_اف

#الست_دى_لو_ماكنتش_اماما

#رحلة_السندباد_السافلة

#معداش_على_بيونج_يانج_على_فكرة

الاعتراف الخامس والعشرون

زمان أما كنا نحب نازل أنا وصحابي نشترى "بناطيل جينز".. كنا بنفكر ألف مرة قبل اتخاذ القرار ده... مش عشان الفلوس.. ولا عشان المواصلات ولا عشان أي حاجة غير لحظة اتخاذ القرار بدخول الشارع الأشهر في تاريخ المناطيل الجينز.

"شارع الشواربي"

طبعا.. إنك تقول إنك عاوز بنطلون جينز في شارع الشواربي.. ده أكنك بالظبط أعطيت الإذن للأوباش ببدأ عملية التحرش بيك عن رضا واقتناع تام بأهمية التحرش على نطاق واسع.

آلاف من العاملين في المحلات اللي في الشارع.. والعاملين في المحلات اللي جوة ومش على الشارع.. والعاملين في المحلات اللي في زخانيق الشارع.. والعاملين في تحت مستحيل تصدق

إنها موجودة ورا زخانيق الشارع وبيقولوا عليها محلات..
كلهم..

بيشدوك..

وتفضل من إيد ده.. لإيد ده.. لشدة ده.. لسحبة ده..
لبوسة ده..!!

"انت بتبوس ليه يا ابن ال....."

ما علينا...

وفي النهاية.. فاز بينا الأقوى.. اللي باقي العاملين في الشارع
يخافوا يتعرضوا ليه..

اقتادنا أنا وصحابي وراه.. واحنا مُساقين كالأنعام.. فكرنا
كذا مرة أنا والعيال صحابي نجري.. بس أكيد حنتمسك..
وحيبهدلونا.. تحس واحنا ماشيين وراه إنه لسة دافع فينا صُرة
الدنانير وواحد صك العبودية من سوق النخاسة اللي في أول
شارع عماد الدين.. سَبَايا حرب رسمي..

دائمًا كنت بتخيل اننا لابسين بناطيل واسعة من تحت..
وفوق عريانيين.. وداهنين اسود.. ومربطوين بسلسلة طويلة
طرفها في إيده.. وبنجري وراه..

"يا جدعان احنا جاين نشترى بناطيل.. خايفين من
إيه؟؟؟ مش عارف"

هو إحساس الخوف من البيع اللي بياخدك معاه من
حارة لحارة.. وانت ماشي وراه.. وفي كلامه طول السكة..

لهجة أمرة قاطعة مش عرضة للنقاش.. إنك حيعجبك قوي
البنطلون الي حتشتريه.. وتاخده..

حتاخده حتاخده.. البنطلون أقصد.. الموضوع منتهي..
المسألة مسألة وقت مش أكثر

قصة إنك تشوفه عاجبك والا لأ دي.. مش هنا.. دي رفاهية
لا تملكها سعادتك في المكان ده..

أما وصلنا للخن.. وده الاسم الرسمي للحنة الي عرضها
مترين.. وارتفاعها مترين.. وعمقها مترين.. وفيها بناطيل
مرصعة.. فرّجنا على الي عنده .

وإيشي تركي مستورد.. وإيشي مش عارف إيه.. وماركة
إيه.. واحنا بنهز في راسنا في إعجاب مصطنع.. على أساس اننا
بنشوف خلاصة محصول الطماطم الصوب الجاهز للتصدير!! !

طبعا هو عارف الحركات القلّة دي كويس قوي.. وعارف
ان الحركات دي بيتبعها محاولة هروب الزبون بأى حجة من
الحجج.. فبيكون هو له دور تاني لمحاولة غرسك أكثر وتديسك
زيادة..

- اقلع البنطلون

- نعم سعادتك؟؟

- اقلع البنطلووووون بقول

- هاهاها شرابات انتو في الشواري.. شرابات

- اقلع البنطلون وقيس يا أستاذ.. ولو معجباكش يبقى
لك الكلام

- لا في الحقيقة أصلي عندي برد في معدتي ومش عاوز اتهوى

- بص حضرتك خش في البروفة دي

- بروفة إيه؟؟.. فين دي؟؟

- هو الخُن ده بروفة حضرتك!

- أيوة بس مفيش لا باب ولا حاجة تغطى يا ريس والناس

رايحة جاية!! !

- بص صحابك حيغطوا عليك.. ومش حيبان منك حاجة..

اقلع بقولللك.

وطبعًا بعد محاولات مستميتة للتججج.. ومقابلتها

جميعًا بحلول مستحيلة إنما هو دائمًا بيخليها حلول منطقية..

اضطريت أخش الخن.. والاتنين صحابي وقفوا على مدخله

جنب بعض عشان يعملوا ساتر... يا ساتر ياااااااااااا رب.

قلعت البنطلون.. وناولته للواد "عمرو" صاحبي حطه

على جنب.. ويقول لصاحبي الثاني محمد

- هات ياعم ناولني الزفت الثاني عشان أتنيّل أقيسه..

الجو برد الله يحرق اليوم اللي قررت أشترى فيه زفت من

هنا.. وكل مرة بنقول كده وبنرجع تاني..

جاءت الصرخة التي لم تستوعبها أذني بكل معانيها مدوية

هادرة.. من بعبييد

الاعتراف السادس والعشرون

كمية الاعترافات اللي بيدخل فيها "ابابا" كنجم شباك أول
عندي كبيرة جدا.. أحبيبي أبابا الله يرحمك.. كان مجنن البيت
كله.. لا.. كان مجنن العمارة..

هى المنطقة عموماً اتجننت كلها بسببه..

كان أبابا بيتعامل معانا في البيت زي أي أب حنون بيحب
ولاده ويضربهم بالجزم.. كان مصمم يخلينا رجالة تحت أي
مسمى وبأي شكل من الاشكال..

وعشان كدة.. كان بيتعمد يحطنا في مواقف يا تخلق
رجالة.. يا تدفعنا اننا نرمي روحنا قصاد ميني باص 58 اللي
كان بيعدي من قصاد البيت عندنا..

أذكر إنه رحمه الله.. قرر في يوم إني كبرت خلاص.. ولازم
بقى أنزل اشتري ليهم الفاكهة في البيت..

- حلوة دي أبابا.. كويسة.. وأنا حعرف منين يعني؟

- مش بقولك حيوان..

- أأمر أبابا.. كُلي آذان صاغية..

- حتمسكها كويس.. وتتطبّل عليها..

- والبياع حيرقص.. صح؟؟؟

- اخرس يا حيوان.. حتخبط عليها لو كان صوت الخبطة

ملوش صدى تبقى مستوية.. ولو كان ليه صدى تبقى مش

مستوية

- هي البطيخة بتصدي أبابا!!!

- صدى صوت يا حيوان..

- آآآآه.. طب أبابا.. حاضر أفنظم..

- اوعى يشوقهالك!!

- عيب كده أحاج.. ما عاش اللي يمد إيده عليًا..

- أنا بقول على البطيخة يا حيوان..

- آآآآه.. هاهاها.. شربات أبابا.. حاضر.. اطمّن

وعنها.. قبل ما يزود في الكلام.. نزلت ورُحت السوق

مسافة ربع ساعة كنت عند الفكهاني.. وبدخلة مفتش التموين

المعروفة دخلت عليه..

- فين البطيخ..؟؟

- ما اهو قدامك يا أستاذ..

- أيوة أيوة.. قصدي مفيش عندك حاجة جوة كويسة؟

- نعم؟؟ البطيخ كله كويس يا أستاذ..

- ممم.. هو كمان بيشكر فيك قوي.. وريني كده واحدة
تكون كويسة..

- اتفضل..

أخذت البطيخة من ايده واستلقفتها.. ودورتها في إيدي
وأنا بعاينها أكني بدور على حاجة ضايعة مني فيها.. وهو
قعد يبصلي بنظرة معروف طبعًا معناها

"انت بتفتي عزيزي الدوق".. أنا طبعًا معبرتوش.. وبعد
تلات دقايق.. رجعتله البطيخة.. وقولت له..

- يا عم شفلنا حاجة كويس.. دي شكلها شق زفت..

- حضرتك اسمها شق لفت..

- احلف؟؟ أنا بسمعهم يقولوا كده في الأفلام بس ما
ركزتش.. المهم شوفلنا واحدة كويسة..

- يا أستاذ اللي في إيدك دي سكر..

- لا لا لا.. أنا مش مستلطفها.. شكلها كانت مصاحبة قبل
كده

- طيب أشقها لك؟؟

- هي إيه دي؟؟

- البطيخة يا أستاذ!! !!

- دي بيضة وفاتحة خالص من القشرة.. دي شكلها مش
مستوية خالص..!!!

- أبابا لا طبعا.. بص طيب

"طن طاطا طن طن بوم بوم بوم" صوت طبلة الزفة..

- انت عبييط يا شريف؟؟?

- أبابا ركز معايا بس ثواني..

"طن طاطا طن طن بوم بوم بوم" صوت طبلة الزفة..

- دي حتطلع شق زفت من جوة يا حيوان..

- اسمها شق لفت أبابا..

- إخرس يا حيوان.. روح رجعها للراجل وهاتلنا واحدة

تكون قشرتها غامقة من برة

- أبابا هو قالي شقها ولو طلعت وحشة رجعها

- انت بتصدق يا حيوان؟؟؟ إجري روح رجعها وهات

واحدة تانية زي ما قلتك

طبعا.. حاملاً همومى وتعبي وخمس ادوار نزول ومشوار

ربع ساعة مشي وبطيخة 5 كيلو توجهت إلى المأسوف على

شبابه الفكهاني.. ودخلت عليه دخلة مفتش التموين اللي

قفش عند الفكهاني عنب "بناتي" في وضع مُخل..

طب أقوله ايه؟؟؟ أقوله ايه؟؟؟

أقولكم..

أقولكم بعدين..

#طن_طاطا_طن_طن_بوم_بوم_بوم

#صوت_طبلَة_الزفتة

#يا_شَرِييييييييييييييييي

#افنظم_ابابا

الاعتراف السابع والعشرون

لكل اللي تابع الاعتراف السابق.. لازم طبعًا أكون تركت فيكم التوشيق والإثارة.. بخصوص حكاية البطيخة اللي كل واحد بيملكها لازم يتعامل معاها بطريقة

"طن طاطا طن طن بوم بوم بوم" صوت طبلة الزفة..

زي ما قتللكم.. دخلت علي الفكهاني دخلة مفتش التموين اللي قفشوا عنده عنب "بناتي" في وضع مُخل

- يعني ينفع كده يعني؟؟؟

- خير يا أستاذ بس؟؟؟ يادي الصباح الكوبية

- ازاى تديني البطيخة قشرتها فاتحة.. أنا كنت عاوزها

قافلة..

- نعم؟؟؟؟!!!

- قصدي غامقة.. قَصْر..

- ما اتجننتش أهو... شوف.. حمرا دي والا مديّة على
مُحمّوحى..؟؟ ها؟؟

- همممممم.. طيب.. دوقها كدة.. يا حيوان

- أهو.. آدي البطيخة.. اهوووووو

وروح قاطم قطعة من البطيخة.. هوووووب.. مطلعش
بطيخ.. طلع بامية حمضانة من اللي أمي ساعات بتسيبها
للصاير عشان تسمها في الفرن.. إيه القرف ده.. أقوله إيه؟؟
أقوله إيه؟؟ يا لهو بالي يا اما.. ده حينفخني.. بُص.. ملهاش
حل يا شريف.. الحقيقة.. ثم الحقيقة.. ثم الحقيقة...

- حلوة أبابا.. مالها..؟؟؟ سكر..شهد مكركر

- مكركر؟؟ حيوان والا مش حيوان؟؟

- فاضي أهوهولك أبابا.. ارحمني.. أنا غلطان.. شاب
أرعن.. حيوان فعلاً

- روح رجّع البطيخة..

- أبابا أنا أكلت منها خلاص.. اخصمها من مصروفي.. ارحم
ضعفي..

- روووح رجّع البطيخة.. وهات الفلوس..

- أبابا أنا لو جبت الفلوس دي حتصرف قدهم مرتين
مراهم تسلخات عليا.. أنا تعبت

- إمشي يا حيوااااااان..

- حاضر أفنظم..

خناقة كبيرة.. ولميت عليه الناس واللي رايح واللى جاي
أدوّقه من البطيخة.. والسّتات اللي ساكنة فوق الفكّهاني تبعت
عيالها اللي راجعة من المدرسة تدوق وتطلع..
وفي النهاية.. انتهى الأمر.. بإنه أخذ قشر البطيخ اللي
فضل..

واداني بطيخة تانية.. ذات مواصفات مطابقة لمواصفات
الجودة العالمية..

أخذتها.. روح البيت.. شقيتها.. "البطيخة طبعًا"..

طلعت سُكر.. بجد

أبأبا طبعًا.. كان له تعليق شهير ساعتها..

- إانت دليل دامغ على إن الحيوانات ممكن تتعلم..

#طن_طاطا_طن_طن_بوم_بوم_بوم

#صوت_طبلَة_الزفتة

#ماله_ام_البرقوق_مش_فاهم_انا

#بطيخ_مولانا_اقرع

الاعتراف الثامن والعشرون

أنا قدرت أحقق حلم كثير من الشباب في وقت المراهقة
الخروج مع بنات جميلة في المرحلة الثانوية في عز الشتاء..

هيببييه

خروجة جميلة.. في مكان جميل.. مطعم محترم.. بتبقى
حاسس في الوقت ده إنك كبير وراسي كده ومتأني.. شعور
بيخليك تمشي مشية الفنان أحمد عبدالعزيز في "مين الي ما
يحبش فاطنة".. أما كانت جيهان وشيرين حيولعوا في بواريك
بعض عشان يتعرفوا على أونكل شنبو.. إحساس جميل فعلاً...

إحساس كمان عالي عالي عالي.. وانت لابس المنطلون
البيج الكلاسيك الي كان منقَّخ من الوسط.. وضيق من عند
الرجلين زي الموضة في بغداد ساعتها.. تحس ان سندباد ماشي في
المطعم.. مش ناقصلي غير صديري على اللحم وسيف وفلوكة..

وطبعاً بقى.. شوية الشعر اللي تحت المناخير دول اللي
لا منهم شنب.. ولا منهم وساخة.. بيحسسوسك انك سمير
الاسكندراني أيام الشقاوة..

"بننننى... نعلالالالالالال... نهررررررررى"

ويا سلام بقى أما يحصلك زي ما يحصلي.. والولاد الشباب
اللي المفروض يكونوا معانا في الخروجة.. كلهم يحصلهم ظروف..
اللي أبوه طلق أمه.. واللي يجيله حصبة على كبر.. نصيب..
فجأة تلاقى نفسك أعزل.. وسط خمس بنات.. يا سلام على
أيام الثانوي الجميلة.. كازانوا الثانوي بنين... كذا نوبا.. مش
نوبا واحدة..

تاكلوا.. وتشربوا.. وتتكلموا.. وتهزر انت بقى.. وتستخف
دم أهلك.. ومهما كان دمك ثقيل.. بتبقى أوكر.. أوووكر..
شربات انت في وسط البنات دي.. فزييع

تستأذن منهم.. بشياكة الفنان محمد الحلو في أغنية
القلب حب وتاه.. وتقوم تروح الحمام تصلح مكياج.. إيه؟؟؟
معرفش هما يقولوها كدة..

تدخل الحمام.. تقفل الباب بالترباس.. الحمام متر في متر..
حوض صغير جداً.. تواليت أصغر.. تغسل إيدك.. تمد إيدك
عشان تضغط على هبابة الصابون اللي متعلقة في الحيطه..
تروح مخلوعة.. ونازلة مَهْبُودَة في الحوض الصغير.. وكل
الصابون اللي فيها ناطط في حجرِك!!

"يا ختالالالالال... البنطلوووون البيج باظ يا ختالالالالال"

طبعا بعد ثواني.. فهموا إن الترباس اتهبب باظ.. وكسروه
من برة.. وفتحوا الباب عشان يواجهوا طائر البطريق الغاضب
اللي هو أنا.. مش عارف ليه محدش فيهم كان قادر يمسك
نفسه من الضحك على منظرى.. بس حقيقي الموقف كان
زبالة.. المية على المنطلون البيج على الصابون على الرغاوى
مخليين شكلى يجنن..

باب الحمام أقرب لباب الخروج..

طبعا.. بدون تفكير.. فاهمين طبعا إيه اللي حصل .

طب والبنات؟؟؟؟

بذمتك.. البنات والا شنب الفنان أحمد عبدالعزيز وكرامته
الفنية؟؟؟؟

عموما هما مش حيزعلو أما يعرفوا إني قمت بعمل
بطولي وجربت ورا حرامي سرق شنطة واحدة ست وجري برة
المحل وجريت وراه من المعادي للمرج.
اللي حينطق.. حشوهه..

خرجت على برة.. الهوا كان سايبيرى.. رومانسي كيك..
شهر طوبة بيمسي بقى كل سنة وانتم طيبين.. أنا متأكد إن
سيبيريا وقتها كانت حر بالمقارنة بالجوده.. الكل تأمر عليّ
اليوم ده.. حتى شهر طوبة.. إخص..

مشي طبعا لحد البيت.. لاني مستحيل أركب وأغرق كرسي
أي تاكسي.. مش ناقص شلايط على الرغاوي.. هى مش ناقصة
كفاية لحد كدة...

الاعتراف التاسع والعشرون

العجلة.. صديقة كل إنسان في الدنيا.. أعتقد إن أغلب البشر ركبوا عجل.. سواء ولاد أو بنات.. حكاياتنا مع العجل كلها جميلة ولذيذة وتضحك..

أنا بقى حكايتي مع العجلة كانت تراجيدي على ساسبنس على شوية رعب على ميلودراما..

أخذني "أبابا" الله يرحمه.. عند أبو الجوخ.. بمناسبة المجموع الكبير في الابتدائية.. وجابلي العجلة "الصفرا في الحمرا" الببي إم إكس الرهيبة..

العجلة اللي كل ما كنت أركبها.. أحس إن البنات مستعدة تحدف نفسها تحت الجنزير بتاع العجلة علشان تنال نظرة من عيوني الحولاناتين في هيام..

العجلة غيرت شخصيتي تمامًا.. مع مرور الوقت.. تحولت شخصيتي إلى الدكتور محمد عبدالوهاب راكب عجلة.. ابتديت

أغني.. ابتديت أبطل معاكسات.. وأعاكس ليه؟.. هما البنات
بيعاكسوني... أو أنا اللي كان بيتهياي إن جريهم من قصاد
العجلة قبل ما اهرسهم يعتبر نوع من أنواع المعاكسة.. بطلو
بقي.. !

ماكنتش بروح في مكان إلا بالعجلة.. المكانين الوحيدين
الي ماكنتش باخد فيهم العجلة هما التواليت والسريير.. غير
كدة.. كنا توأم ملتصق..

وكان "أبأبا" في الرايحة والجاية ذالل أبداني طبعا..

- يا شرييييييييييييييييييييف

- أفنظم أبأبا؟؟؟

- أخبار العجلة إيه يا حيوان؟؟

- بتبوس إيديك أبأبا

- طيب خللي بالك عليها

- في عونيا يا أونكل

- اخرس يا حيوان

- حاطر أبأبا

بعد مرور أسبوع من شراء العجلة.. أيوة أسبوع واحد
حصل فيه كل التغيرات دي.. بعد الأسبوع ده... اتسرقت
العجلة!! !!

- مين؟؟ فين؟؟؟ امتى!! أنا؟؟ دا أنا يموت فيها؟؟ هو أنا
أقدر أبهدلها؟؟

- غريبة!! هو مش كانت الإيد دي سودة؟؟

- آآآه صحيح!! تصدق صح أبابا..!! اترشت مع
الدريكسيون الظاهر!! !

- إيه؟؟؟

- لا دا أنا غيرتها أبابا.. روشت العجلة.. هاهاهاه.. شربات
أبابا.. شربات..

- غريبة!! ! مش يا ابني الكرسي دة كان أحمر؟؟؟

- مالك؟! آه والنبي.. تصدق!! ! وبعدين مكانش عريض
كده فعلا..!!

- إيه؟؟؟؟!!!!

- لا يا أبابا أحببيي.. دا أنا غيرته عشان كان تابعني في
القاعدة

- طيب.. غريبة!! ! مش عارف ليه حاسس ان العجلة
صغرت!! !!

- إنت عارف بقى أبابا.. الغلية بتخلي الحاجة تكش..
هاهاهاهاها.. شربات أبابا.. شرباااات

- إخرس يا حيوان.. أنا طالع البيت.. ورايا علطول.. وكفاية
لعب بالعجلة..

- حاضر أفنظم..

الاعتراف الثلاثون

ماما خافت عليًا جدًا وأنا في سن الطفولة.. من الأمراض الي طول النهار في التليفزيون بيأكدوا إنها حتجيلك حتجيلك مهما حاولت تستخبي منها.. زي شلل الأطفال والسعال الديكي والثلاثي..

ما يعرفوش إن الأمراض دي بتحاول الهرب من البلد بأي طريقة.. إنما للأسف مفيش دُول راضية تستقبلها

أماما طبعًا.. كانت بتخاف عليًا أنا واخواتي جدًا.. فسَحَبِتْنَا زي ما الناس بتسحب الخرفان الحرنانة يوم الديبح الصبح.. وتلاقي الخروف قاعد على قرافيصه ومسحوب من قرونه ولسانه مدلدل برة بقة حالفًا مُقسَّمًا مليون كعبة ما هو رايح معاكم في حته..

إنما على مين.. أماما كانت مصممة تاخذنا.. وتطعَّعنا.. التطعيم إياه ده الي بيستخدموا فيه إِبْرُ من بتاعة العصر

الجوراسيكي.. اللي بيسيب دايماً فتحة غويطة في مكان ما بتاخده.. بتستخدمها انت بقى باقي حياتك بعد كده في حاجات كتير.. تشيل فيها فلوس.. تخبي منديل.. تحوش.. كده يعني..

وُصُولنا للمستوصف.. كان بداية مرحلة جديدة من مراحل محاولات الهروب الجماعي.. لأن رؤية المذابح وضحايا القصف الصاروخي على المستوصف اللي خارجة من بابه ومعظمهم فاقد الإحساس للطرف اللي اتطعم فيه.. أو فاقد الطرف نفسه تقريباً مش متأكد.. وفي حالة إعياء تام كانت كفيلة بتحطيم قلوب أقرى الرجال.. فما بالك بمجموعة معيز مرعوبة في الأساس.. !!

التَّمرْجِية والممرضات مِسْكونا أثناء محاولة الفرار التي بأت بالفشل.. مِسْكونا مجاملة لـ أماما طبعا اللي داخله من باب المستوصف.. وطبعاً.. "اي خدمة يا مدام.. وأأمري سعادتك.. ولو عاوزه تدخلني بسرعة".. يموتو في الأذى ولاد الهرمة..

وطبعا كلهم كوم.. والحيوان الأجرّب اللي لا يمكن إني أنسى شكله اللي جه يسأل أماما.. ويعرض خدمات أهله السادية بمنتهى التناحة.. ويقولها..

"انا حمسكهم لحضرتك يا مدام ساعة التطعيم وأي خدمة

"

حجم الرعب المتولد من الجملة دي لوحدها.. كان كفيل إن احنا الثلاثة نبتدي مرحلة التبول اللا إرداي فوراً.. وخيالات

النعريف بالكاتب

شريف أسعد من مواليد القاهرة 1976

حاصل على بكالوريوس التجارة من جامعة القاهرة عام 1998 - دور
نوفمبر "ناجح بالعافية"

عضو مجلس إدارة جريدة المواطن الإلكترونية

كاتب حر في عدد من المواقع والصحف مثل:

- موقع "المواطن"

- موقع "الجريدة"

- موقع "شبكة أخبار مصر"

- موقع «البديل»

- جريدة «الوعي العربي» الورقية

مدير إدارة التخطيط والمتابعة بإحدى شركات المشروعات الصناعية
الكبرى .

مؤسس «التيار الكوميدي».

للتواصل مع الكاتب

<https://www.facebook.com/sherif.asaad1>

المحتويات

٧	مقدمة
٩	تقديم
١١	الاعتراف الأول
١٧	الاعتراف الثاني
٢٣	الاعتراف الثالث
٣١	الاعتراف الرابع
٣٧	الاعتراف الخامس
٤١	الاعتراف السادس
٤٩	الاعتراف السابع
٥٥	الاعتراف الثامن
٦٣	الاعتراف التاسع
٦٩	الاعتراف العاشر
٧٧	الاعتراف الحادي عشر
٨٥	الاعتراف الثاني عشر
٩٥	الاعتراف الثالث عشر
١٠٥	الاعتراف الرابع عشر
١١٥	الاعتراف الخامس عشر
١٢١	الاعتراف السادس عشر
١٣١	الاعتراف السابع عشر

١٤١	الاعتراف الثامن عشر
١٥٣	الاعتراف التاسع عشر
١٥٩	الاعتراف العشرون
١٦٧	الاعتراف الحادي والعشرون
١٧٣	الاعتراف الثاني والعشرون
١٧٩	الاعتراف الثالث والعشرون
١٨٧	الاعتراف الرابع والعشرون
١٩٥	الاعتراف الخامس والعشرون
٢٠٣	الاعتراف السادس والعشرون
٢١١	الاعتراف السابع والعشرون
٢١٧	الاعتراف الثامن والعشرون
٢٢٣	الاعتراف التاسع والعشرون
٢٣١	الاعتراف الثلاثون
٢٣٧	التعريف بالكاتب



دار توياء للنشر والتوزيع